

東
華
續
錄

臣王先謙敬編

臣周潤審恭校

乾隆二十一年丙子春正月己巳朔命舒赫德協同將軍成衮扎布駐烏里雅蘇台○庚午諭軍機大臣等自辦理準噶爾以來喀爾喀王公等朕或施恩加封或按律治罪皆視其功過斟酌至當初不因喀爾喀係舊日臣僕有意苛求亦未嘗任其希圖僥倖非分加恩也喀爾喀部落素有怯懦退縮之習從前初議進兵曾經降旨訓勉冀其各自振作嗣喀爾喀王公等皆知仰承朕意平定伊犁時人皆奮勉效力是以將和托輝特郡王青滾雜卜等優敘晉封而額琳沁多爾濟身為扎薩克親王參贊軍務將軍班第特派伊監視阿睦爾撒納同行先經齊木庫爾密告逆賊叛迹已露

而扎薩克琳丕勒多爾濟等又復屢次言及理宜相機擒治乃額
淋沁多爾濟並不速辦反以阿睦爾撒納係雙親王伊係單親王
難以辦理爲辭逡巡觀望以至阿逆乘閒脫逃次日始帶兵追逐
勢已無及試思此何等事而額琳沁多爾濟有意貽誤致使逆賊
免脫其心尚可問乎覈其情罪萬無可逭朕是以將伊治罪而桑
寨多爾濟尙屬幼年一聞阿逆遠竄卽能奮身追捕巴雅爾什第
等勦殺包沁勇往可嘉朕皆加恩封賞車布登扎布效力軍營克
繼伊父勞績又將阿逆謀叛之意屢次密告將軍班第是以朕格
外施恩由公爵封至貝勒以示鼓勵至額駙色布騰巴勒珠爾與
和托輝特郡王青滾雜卜原係阿睦爾撒納同隊之人逆賊負恩
背叛形迹顯然伊等豈無所知且朕曾經密諭色布騰巴勒珠爾
令其小心防範乃全不經心反爲逆賊所惑與班第等意見不和

經朕降旨令色布騰巴勒珠爾來京並將青滾雜卜調辦汗哈屯
事務孰意色布騰巴勒珠爾到京並未在朕前奏及阿睦爾撒納
一語在色布騰巴勒珠爾身爲額駙位列藩王不但伊無附賊之
理卽青滾雜卜世受國恩亦斷不至與逆賊通謀朕原可以深信
第色布騰巴勒珠爾年幼無知一至於此朕實不勝憤懣已降旨
將伊王爵革退嚴加禁錮至青滾雜卜亦係御前行走之人非他
人可比且去歲進兵甚屬奮勉其罪不過與逆賊共事之時稍爲
附和耳朕念伊往日勤勞姑從寬免嗣後益當痛改前非勉力報
效朕用人行政一秉至公信賞必罰功罪皆由人自取毫無畸重
畸輕之見可告天下後世恐伊等不知妄生疑惑著將此通行曉
諭喀爾喀王公等知之○辛未哈達哈奏據阿睦爾撒納奏班第
等臨事暴急陵辱喇嘛薩喇爾擄掠無忌激成變亂臣受恩圖報

見擬整頓四衛拉特遊牧並令回人布魯特塔什于哈薩克等臣服祈賞臣管轄四衛拉特印信諭朕覽阿睦爾撒納所奏顯係窮蹙無歸故爲此搖尾乞憐之狀以圖僥倖於萬一然其背叛之罪百喙難辭見在伊犁喇嘛宰桑等前往擒拏並將軍策楞已經進兵會剿自可計日就擒明正其罪以伸國法至伊摺內所奏情節雖未可盡信但阿睦爾撒納中途逃竄並未前抵伊犁而該處之喇嘛人等遂至倉卒生變則班第等之辦理不善已可槩見適與朕前降之旨相符將此宣示中外知之又奏據侍衛順德訥稟稱至額貝圖諾爾宣諭阿布賚不勝歡忭遣人齎奏同入覲又至阿布賚之弟汗巴巴處宣諭訖旋至博囉塔拉見阿逆患病兵不過二千餘看來必逃入哈薩克又據遣諭阿睦爾撒納之兆齊稟稱詳察所屬離散人人含怨報聞○免齊齊哈爾黑龍江墨爾根呼

蘭等八旗兵民借欠米石○壬申諭據衍聖公孔昭煥奏至聖廟
戶在廟納丁供差一切本身徭役俱蒙恩優免之人歷來遇地方
官有額外派辦派買事件難以隨心呼應每事調劑殊屬非易請
將見在戶丁酌留五十戶其餘戶丁改歸民籍交地方官編審與
民籍一體當差等語我朝輕徭薄賦凡屬編氓本無公旬徭役地
方遇有興作亦皆動帑予值初非額外差派不知其所奏派辦派
買者何事或東省尙有此陋習則槩當嚴行禁止不獨廟戶爲然
著該署撫白鍾山查明據實具奏○諭軍機大臣等孔昭煥所奏
裁減廟戶一摺已交署撫白鍾山查奏至摺內所稱皇莊名目想
沿襲前代舊稱然亦止應稱官莊何得輒用皇字俱著改正子不
云乎甚矣由之行詐無臣而爲有臣孔昭煥可謂不能讀其祖書
矣並傳諭孔昭煥知之又諭衍聖公奏摺兩件一奏告子不宜從

祀告子是言性惡之人與孟子相反不應並祀尙屬有理已批九卿議奏然亦絕無關繫之事讀書人每於此等處沾沾置辨一奏廟戶不應當差內稱皇莊字樣亦殊不合如係歷代賜田宜稱官莊爾等可卽爲改正至此時丁銀已經停徵安有地方官更令百姓當差之事且係何項差使朕實未明若因東巡派令修路則修路皆動官項雇夫然令地方官舍本地之人不雇派而令遠派他處之人必無是理况旣給價則非強派且朕展謁先師衍聖公卽躬身卻埽尙屬當然督令廟戶除道清塵以供奔走更理所應爾豈轉庇廟戶並給價雇派亦不肯爲更爲愚昧之至此不過倚大學士陳世倌外姻之勢干與地方公事其所陳奏大都發禮部議又係陳世倌管理可以互相倚庇伊係少年之人理宜安分自守方可保其安富尊榮之樂若干與一毫公事不特陳世倌不能

保其大學士之任卽衍聖公家豈無弟男子姓可堪承襲者便是無福承受之人爾等可繕諭旨發出陳世倌亦並寄字與伊知之

○已卯諭軍機大臣等薩喇爾之兄布林及和碩特台吉等來使五人見已到京朕詢問彼處之人據布林等奏稱約蘇圖將察哈什留於彼處遊牧等語察哈什係阿睦爾撒納一類之人斷不可留於彼處著傳諭約蘇圖將察哈什交與策楞遴員拏解來京前降旨令策楞等到伊犁時將噶爾丹策零與圖查明齎京今看來該處人等敬信綽羅斯之人著不必將噶爾丹策零與圖齎京再前聞班第之子色布騰被羈彼處色布騰非他人可比伊父被賊圍困自盡伊何忍惜命苟活似此等人亦何足惜是以降旨將伊交鄂勒哲依令在彼處差委今據諾木察告稱色布騰自盡傷輕是以未死則色布騰尙知捐軀盡義不必留於彼處卽傳諭策楞

等知之○諭達什達瓦妻車臣默爾根哈屯曰達什達瓦係準噶爾後裔自準噶爾擾亂之後所屬離散各失生業大兵平定伊犁時將軍大臣等卽將汝土地陳奏今汝率眾至巴里坤投誠汝以婦人能知大義輸烟臣服朕甚嘉焉是用特沛恩施封汝爲車臣默爾根哈屯所屬大宰桑布林鄂齊爾托里俱授爲散秩大臣其餘人員各量本職分授爲管旗章京副管旗章京參領等官得木齊授爲佐領收楞額授爲驍騎校移駐阿爾台地方安居樂業汝受天朝厚恩宜撫綏所屬俾各安輯以期欽承毋懈至汝所屬宰桑等受朕恩施得受官爵亦宜各飭所屬永除剽掠之習誠能安靜守法庶承受有加無已之恩施若更妄肆劫奪有違禁令該管官員必守法嚴行約束不可嘗試特諭○諭據阿蘭泰奏稱郡王品級貝勒色布騰前赴軍營中途病故等語色布騰自入覲以來

深知感戴朕恩遇事誠心效力人亦明白今聞身故深堪憫惻著
賞銀一千兩經理喪事其貝勒職銜卽著伊子巴桑承襲○授蒙
古公瑪什巴圖爲副盟長○庚辰諭軍機大臣等前據富勒渾奏
鄂樂舜於上年在浙江任內藩司同德見其缺用授意分司鄭景
莊勒派通省鹽商銀入千兩轉交鄂樂舜收受等語因特命侍郎
劉綸馳驛前往會同總督喀爾吉善查審具奏今據劉綸等查奏
情節甚屬含糊撫藩脣通省封疆重寄果有通同營賄之事斷難
姑容必須詳悉研審務得實情方可按律治罪富勒渾原奏同德
於鄂樂舜初到時授意分司鄭景莊勒派商銀而喀爾吉善等則
稱甲商葉如春等於鄂樂舜調任安徽商量公送程儀託運判鄭
景莊轉稟鄂樂舜因向借貸隨公備銀六千兩送至舟次與富勒
渾原奏初到任時授意勒派之語全不相符如果情節屬實富勒

渾卽非誣枉鄂樂舜而同德無授意勒派之事則是富勒渾誣枉同德也卽當詰問富勒渾若富勒渾無可置辨卽當參奏富勒渾治以誣人之罪乃喀爾吉善並不詰問及此僅據鄂樂舜等一面之詞諉卸運判鄭景莊而鄭景莊又不過傳述其語並未過付不過交部察議無可治罪而同德富勒渾之虛實是非置之不問希圖調停和事有是理乎且商人等供內稱鄂樂舜調任浙江各商到蘇迎接賞給體面因於去任時餽送程儀等語試思鄂樂舜身任巡撫管理鹽政眾商來接時何以卽賞與體面顯有市惠營私情事既有此供何以竟未究詰惟以離任缺費借貸爲詞一似情有可原不知者以爲借貸卽加治罪於法過重試問鄂樂舜到安徽任已及一年此一年中還過幾何還過幾次其爲借貸爲勒索可以不辨自明此等緊要處皆必須研鞫者而一味含糊卽此

便可完案朕辦理庶務一秉大中至正從未肯稍爲遷就此內外臣工所共知劉綸於外省案件閱歷未深喀爾吉善歷任封疆不應如此顚預草率殊非朕委任之意此案著交與總督尹繼善就近前往浙江會同伊等悉心重加研訊如仍不得實在情節朕必將該撫潘臬等槩行革職並提解眾商及有名人犯同至京師候朕特派大臣嚴審定擬○辛巳諭軍機大臣等內大臣尼瑪深感朕恩伊同遊牧時卽將該鄂拓克內派撥兵丁馳赴軍營甚屬奮勉著加恩賞給騎都尉世職卽於伊子內指名具奏令其承襲○命江南疏濬各州縣支河代賑○甲申賜厄魯特屯兵籽種銀兩○丁亥策楞奏大兵進剿遇阿巴噶斯得木齊哈丹西喇布爾古特收楞額得勒克恩克等投誠請擒隨阿逆同叛之哈丹贖罪查逆賊阿巴噶斯屬人理宜全誅但天兵一到卽悔罪來投尙爲可

恕隨令諭各得木齊等共擒哈丹其班咱遊牧已收取並將伊弟喇嘛達什藏布擒拏報聞○己丑諭軍機大臣等據策楞奏稱哈丹攜帶阿巴噶斯妻子脫逃內大臣尼瑪領兵前往追捕等語尼瑪自到軍營以來頗著勞績今又能勇往任事殊屬可嘉尼瑪原係布魯古特台吉之裔著施恩晉封公爵仍辦理圖什壘勒事務至圖什壘勒辦事人宜量其年勞酌定次序鄂勒哲依係舊臣年亦最長著在前哈薩克錫喇次之其次則尼瑪又其次則約蘇圖此所定次序俱係斟酌至當著策楞等明白曉諭鄂勒哲依等知之再此時阿睦爾撒納想已拏獲著交薩喇爾鄂實並添派哈清阿協同解京仍著伊等沿途小心照料○辛卯諭白鍾山查覆衍聖公孔昭煥所奏廟戶一摺稱並無派累之事數年以來朕巡幸所至一切供頓取諸內府從未累及閭里卽除道安營亦皆動帑

予值至於隨營薪蔬芻秣之屬則應從官兵日用所必需有司先期儲備以待臨期給價和買此臨幸所至皆然亦斷無使隨駕之眾皆自京攜數月糧而不許沿途買用之理况朕親祭曲阜卽衍聖公尙當躬自卻掃豈有轉底廟戶歸咎有司之理今據白鍾山查明有糧之家依託廟戶影射居奇及飭該縣退還價買糧石等事且稱孔昭煥少年怯懦皆伊叔祖孔繼洵孔繼汾主持慫恿等語其憑藉家世把持生事殊不能安分自愛孔昭煥雖云年少已非幼稚無知可比本應交部治罪姑念其爲聖人後裔著加恩免其交議孔繼洵孔繼汾著交部嚴察議奏○諭軍機大臣等據富德奏稱見在催令噶勒藏多爾濟作速進兵並稱巴雅爾未經遣人赴額琳沁處等語此奏未協事機噶勒藏多爾濟因伊子病故傷悼成疾乃情理之常朕尙降旨令其善爲調攝至巴雅爾因馬

匹不敷亦係實情況見在伊犁喇嘛宰桑等出兵追擊阿睦爾撒納是噶勒藏多爾濟之兵已可不遣至和通鄂勒會經途遇布林則巴雅爾未遣使於額琳沁想已知布林前來之信耳富德不論事之輕重惟恐與伊前奏不符喋喋陳奏所見殊屬鄙小富德著革去參贊大臣仍留副都統職銜專管臺站事務一切軍營事宜毋得干與○甲午策楞等奏據投誠之庫圖齊稱上年同伊犁喇嘛等與將軍薩喇爾公丹拜等約於十一月初一日在博羅布爾噶蘇台闊勒奇嶺兩路會齊協擊阿逆因諾爾布敦多克兵未至阿逆得信豫爲防備至十二月十五日薩喇爾及諾爾布敦多克錫克錫爾格等在伊犁諾羅斯哈濟拜牲地方與阿逆遇衝殺兩日阿逆與回人和卓木合兵勢頗盛遂各四散等語見在錫克錫爾格與薩喇爾等由珠勒都斯前來阿逆已入伊犁應兩路會剿

卽令鄂勒哲依等帶兵由珠勒都斯進臣等仍勦滅阿巴噶斯等
遊牧直抵伊犁又據參贊大臣哈薩克錫喇等報兵至瑪納斯台
吉達什領子寨音伯勒克等投誠願出兵效力至和爾郭斯河獲
阿逆信用之宰桑察袞並伊子巴朗見派侍衛布瞻泰解京諭軍
機大臣等策楞等奏稱據庫圖齊告知伊犁見在情形伊等旣與
鄂勒哲依等聞知此信卽議分路前進甚合機宜朕意庫圖齊所
言尙屬可疑未必非阿逆詭謀冀緩大兵前進之計今策楞等不
爲所惑分道夾攻計日自可就獲至阿逆雖已前往伊犁其所居
塔爾巴哈台博囉塔拉等處應尙有存留之人著派尼瑪帶兵數
百名前往勦滅以分賊勢其阿巴噶斯哈丹二人雖力窮來降亦
斷不宜寬貸伊等早經歸順乃助阿逆爲亂情甚可惡如果知罪
將阿逆擒獻來降不特免其誅戮尙當加恩如僅束身來降仍卽

行正法以彰國憲著曉諭庫圖齊令其轉告阿巴噶斯等知之察
察亦係助惡之人今既擒獲卽嚴加看守押解來京治罪伊妻係
杜爾伯特汗車凌之女著加恩寬宥策楞等既交哈薩克錫喇安
置甚屬妥協俟事竣後車凌等移往舊游牧時仍令與車凌同住
再鄂勒哲依係準噶爾舊人甚屬幹練今既領兵由珠勒都斯進
發著加恩照將軍體制統領辦事以鄂實爲參贊大臣遵照前旨
諸事聽其措畫悉心辦理朕意再派吞圖布偕鄂勒哲依同行更
屬有益此旨接到若鄂勒哲依已經前進吞圖布亦毋庸更往仍
令隨策楞等辦事見據鄂實奏稱遵將軍檄文卽在特訥格爾軍
營整齊兵馬剋期前進等語伊等領兵前往遇見薩喇爾卽將加
恩鄂勒哲依統領大兵之處詳悉諭知因鄂勒哲依曾在準部辦
理圖什墨勒事務招降人眾易於集事若薩喇爾乃係受恩最久

之人自能仰承朕意與鄂勒哲依會合時一切事宜俱應聽鄂勒哲依指示和衷共濟惟期迅奏膚功以副委任其納噶察等卽遵前降諭旨輕騎前往阿克蘇城曉諭眾回人等如遇阿逆逃竄往彼卽行擒獻○乙未諭軍機大臣等達爾黨阿等奏稱薩喇爾領兵由珠勒都斯前來已遣喀爾喀公恭格敦丹等先至俟其到時卽會同前進擒剿逆賊等語薩喇爾帶領喀爾喀王公等辦事伊犁原無重兵駐紮一旦中賊詭謀被圍受困朕甚深軫念今能奮身歸來不特不加罪譴俟阿逆擒獲後尙當格外施恩著將此明白曉諭薩喇爾等此時見在同來者若干人其尙留彼處者若干人並陣亡及病故者俱交與薩喇爾查明奏聞分別加恩薩喇爾錫克錫爾格巴桑俱遠道前來將來又卽領兵深入俱著加恩各賞銀三百兩錫克錫爾格巴桑並授爲散秩大臣諾爾布敦多克

前已降旨封授公爵其同來之喀爾喀察哈爾厄魯特等俱著酌量賞賜令製裝仍往軍營效力所有定邊右副將軍印原係薩喇爾掌管今應仍行給與昨命鄂勒哲依由珠勒都斯進兵伊在準部原辦圖什墨勒事務人甚厯練是以令其統領大兵照將軍體制辦事且其年較薩喇爾爲長今與薩喇爾同隊其定邊右副將軍印著伊二人公同掌管其奏事列名應以鄂勒哲依爲首扎拉豐阿此時已應與策楞同在一處卽著在參贊大臣上行走不必更用副將軍印伊等務期屏去形迹和衷共濟方爲無責任使前據哈達哈等奏稱將回人阿底斯等遣往西路效力卽交與鄂勒哲依等帶領前往以便招服各部落回人但此內有與阿逆同謀者不可不加意覺察如有形迹可疑之人卽行正法見據錫克錫爾格等告稱彼處回人附和逆賊甚屬可惡且能資給阿逆馬匹

進兵時卽將回人等牲畜收取亦可以增我兵力再特訥格爾一
帶見有臺站事務富德不必同達爾黨阿等進兵仍著駐紮彼處
辦事頃兆惠亦知薩喇爾前來之信奏請帶兵由吐魯番往迎已
降旨催其前往著卽前赴特訥格爾會同富德辦理臺站事務○
丙申諭軍機大臣等據薩喇爾錫克錫爾格告知明噶特與阿睦
爾撒納合明噶特係沙克都爾曼濟之弟前曾圖占沙克都爾曼
濟應得分例著鄂勒哲依薩喇爾傳諭沙克都爾曼濟見在明噶
特黨惡大兵進剿所有明噶特屬下人俱著賞給沙克都爾曼濟
渠可差人先往招致以分賊勢再巴爾達穆特宰桑宏霍什等俱
負約未至策楞達爾黨阿鄂勒哲依薩喇爾等兩路進兵詢明此
等人如果係阿睦爾撒納之黨遇卽剿辦得其牲畜亦可益我軍
資至宰桑巴桑等來時途遇阿睦爾撒納之姊德勒格爾之妻帶

兵來阻如已就擒卽解京如未獲卽訪其向何處逃竄蹤跡追勦再錫克錫爾格巴桑等俱已起程前來遊牧處所無人約束著伊等差人赴彼處諭令遊牧地方人等大兵不日卽到豫將兵丁派安一聞大兵之信卽速來迎如此辦理伊等卽可隨帶約束於事亦甚有益著達爾黨阿傳諭遵照辦理至達什達瓦之妻車臣默爾根哈屯所派之兵曾經賞銀之處想伊等已知諾爾布敦多克等台吉及宰桑錫克錫爾格巴桑等所派隨往之兵亦著每名賞銀三兩至進兵時由各處投誠之兵均係後至毋庸算入○丁酉諭阿克敦簡任中外宣力有年上年因患目疾特予致仕俾得安養冀其痊愈今聞遠逝朕心深爲軫惻應得卹典著察例具奏尋予祭葬諡文勤○達爾黨阿奏圖勒奇博羅布爾噶蘇台二嶺雪大路窄阿逆已據伊犁必守二嶺今由珠勒都斯至烏魯特遊牧

調集伊等兵併進較利若待巴里坤兵齊已遲見同富德帶索倫兵八百名於正月十五日往迎薩喇爾並約噶勒藏多爾濟於十七日在濟木薩會合諭軍機大臣等遵爾燕阿富德等不俟薩喇爾迎來卽帶領見在所有兵丁向珠勒都斯進發甚合機宜富德前因辦事乖張令其不必在參贊大臣上行走駐紮特訥格爾專管臺站事務今旣已進兵意尙勇往著仍授爲參贊大臣毋庸回至特訥格爾辦事其臺站事務著兆惠會同莽阿納辦理

二月庚子諭各省駐防兵丁不准在外私置田產有物故者其骸骨及寡妻仍令各回本旗此定例也朕思國家承平日久在內在外俱已相安一體若仍照例辦理則在外當差者轉以駐防爲傳舍未免心懷瞻顧不圖久遠之計而咨送絡繹亦覺紛煩地方官頗以爲累嗣後駐防兵丁著加恩准其在外置立產業病故後卽

著在各該處所埋葬其寡妻停其送京但各處情形不同兵丁內有無力置地營葬者亦未可定著該將軍都統等酌定公項置買地畝以爲無力置地窮兵公葬之用再向來此等駐防兵丁有因患病事故呈請回京到京後又復挑選差使者甚屬無謂今旣准其在外置產安葬所有呈請回京之例著停止著爲例○諭八旗另記檔案之人原係開戶家奴冒入另戶後經自行首明及旗人抱養民人爲子者至開戶家奴則均係旗下世僕因效力年久伊主情願令其出戶見在各旗及外省駐防內似此者頗多凡一切差使必先儘另戶正身挑選之後方准將伊等挑補而伊等欲自行謀生則又以身隸旗籍不能自由見今八旗戶口日繁與其拘於成例致生計日益艱窘不若聽從其便俾得各自爲謀著加恩將見今在京八旗在外駐防內另記檔案及養子開戶人等俱准

其出旗爲民其情願入籍何處各聽其便所有本身田產並許其帶往此番辦理之後隔數年似此查辦一次之處候朕酌量降旨此內不食錢糧者卽令出旗外其食錢糧之人若一時遽行出旗於伊等生計不無拮据其如何定以年限裁汰出旗之處交與該部會同八旗都統詳悉定議具奏○諭軍機大臣等據舒明奏稱厄魯特部人擅殺臺站侍衛並據厄魯特侍衛丹津告稱訥默庫帶伊遊牧人等移至額克阿喇勒時卽欲逃叛等語看來訥默庫已露背叛情形著卽傳諭阿蘭泰令將駐紮烏里雅蘇台及附近喀爾喀兵丁酌量飛調帶領堵截其烏里雅蘇台軍營存貯錢糧派兵加意防守阿蘭泰追及訥默庫如果抗拒卽行誅戮所有屬人照阿睦爾撒納屬人一例辦理擒拏訥默庫時並將伊宰桑察罕鼎濟巴圖濟爾噶勒烏察喇勒等一併拏獲伊等從前在熱河

時而奏訥默庫必不生事今若隨同逆賊逃竄情理可惡必應重治其罪如訥默庫尙無背叛實據卽將丹津首告情節諭知令其至烏里雅蘇台與丹津質對俟到時將丹津一併拏解來京仍諭知管解人員解至察哈爾附近地方卽將丹津釋放並將加恩授丹津爲散秩大臣令在察哈爾居住之旨密行曉諭丹津俾伊不生疑懼其訥默庫同部之剛多爾濟巴圖博羅特等會勸阻訥默庫逃竄著明白傳諭伊等仍照舊安居不因訥默庫一人致受株累再昨經降旨令哈達哈帶兵往阿爾台一路前進今既有此事應卽帶領兵丁在各處邊卡防守毋使逆賊得以乘閒脫逃○署山東巡撫白鍾山奏山東科派陋習久除本年東巡豫備草豆咨部動項買備查山東無公役惟支更守夜開溝栽樹修堰皆民間自衛田廬據鄒縣知縣大章詳稱孔孟紳衿禮生廟戶十居其七

民僅三分應差未免偏枯經臣照例批准嗣後禮生樂舞免本身廟戶許一戶承襲餘不准依附並免孔傳是等輒以前撫郭一裕批准優免舊碑擡入縣衙查非敕建與部頒之文該縣阻其豎立尙無不合諭白鍾山查覆孔昭煥所奏鄒縣知縣大章私毀遵例免差碑碣一摺孔昭煥之不能安分自愛干與地方公事更屬顯然我朝百年以來薄海編氓從無公旬徭役所有守夜開溝栽樹修堰等事乃民間自爲保護相助之誼如江西湖廣等省沿江隄堰民間自爲修防者甚多何得謂之差徭若並此而倚藉樂舞廟戶名色槩不承應是一鄉之中止令無業貧民數戶專任其勞而依託附名之徒安坐而享其利有是理乎衍聖公之在曲阜本一大鄉宦耳近來綱紀肅清各省薦紳咸知守法奉公罔敢武斷滋事孔昭煥尤當勉承祖訓以爲士民表率豈可袒庇戶人遇

事掣肘朕前念其爲先聖後裔降旨姑免其交議今觀白鍾山奏覆情節則孔昭煥旣袒護陳奏於前仍復巧辭緣飾於後朕雖欲曲爲寬宥而不能矣孔昭煥著交部嚴加議處以爲居鄉多事者戒○辛丑諭軍機大臣等策楞奏稱尼瑪等未經擒拿哈丹止獲阿巴噶斯哈丹等妻孥並招降取得木齊等功罪相等應否免議等語尼瑪受朕深恩奮勇效力已擒獲阿巴噶斯哈丹妻子及招降眾得木齊哈丹聞風先遁尼瑪等非退縮不前有心縱賊者可比著策楞曉諭伊等免其處分仍觀後效再見在大兵兩路前進哈丹又逃往阿逆處軍中情形阿逆必已知悉或逞其詭計別生事端或畏懼逃竄遠處俱未可定策楞等務須相度機宜迅速前往○甲辰 上御經筵○乙巳諭軍機大臣等前聞內大臣公瑪不特由圖勒奇嶺前來曾派伊孫扎木禪往迎並未相遇今又聞

數月瑪木特尙無信息朕心甚爲軫念著策楞留心訪問見在何處卽行奏聞再沙克都爾曼濟曾告知富德從前阿睦爾撒納班珠爾納噶察等將準噶爾鄂拓克人等私自占據等語納噶察上年在伊犁時原依附阿逆行事占據別部落人眾後因伊至熱河卽將阿逆背叛情形據實供出是以施恩寬免仍令其赴軍前效力然其人終不可信事竣後必至故智復萌亦著策楞留心查辦毋得任其占據○戊申諭軍機大臣等兆惠等奏稱接薩喇爾吐魯番來信卽遣人令其由彼處進兵並赴特訥格爾會同商議等語兆惠辦理甚合機宜前曾降旨令兆惠至特訥格爾辦理臺站事務今著傳諭兆惠伊到特訥格爾若事務繁多卽留彼處辦事如一切尙易料理卽著會同達爾黨阿等領兵進剿在參贊大臣上行走其特訥格爾臺站事務交與三格管理並傳諭和起等所

有巴里坤一應事務俱照兆惠所定章程悉心經理○諭據阿蘭泰奏稱將訥默庫情形究問丹津等語阿蘭泰大不曉事彼意以爲此事似舒明諉之於彼見在無論訥默庫有無叛意但已殺我侍衛掠去運米駝隻似此目無法紀尙復行猶豫之有況今嫌隙已成卽欲中止豈惟必不可行反所以啓其疑慮速其逃遁耳阿蘭泰接到舒明咨文當卽親自帶兵前往堵截將訥默庫喚來卽便擒拏審明事果屬實將訥默庫辦理便眾厄魯特覬覦之念潛消默釋設訥默庫誠無叛意亦當將殺我侍衛掠去駝隻之正犯審明正法再將訥默庫如何處治之處請旨辦理乃覽阿蘭泰奏摺議論紛如而應辦之處並未陳奏彼所辦者俱屬何事况丹津據彼見聞首出又見有戕殺侍衛搶掠駝隻二事阿蘭泰並不思及而反究問丹津殊屬非是著作速寄知阿蘭泰遵朕前旨妥爲

盡心辦理彼能保納默庫之必不反乎將來備致免脫朕惟阿蘭
泰是問慎之○己酉吏部議奏孔昭煥袒庇廟戶武斷滋事應革
去公爵主事孔繼汾貢生孔繼涼主持干與應革去主事貢生得
旨孔昭煥袒庇戶人不知安分自愛部議以革去公爵實所應得
但朕究念其爲先聖後裔且尙屬年少無知著加恩免其革退公
爵孔昭煥其閉戶讀書勉承祖訓以仰副朕終始曲全至意儻仍
怙終不悛再敢干與公事是則自取罪戾毋望倖邀格外恩也餘
依議○庚戌諭尹繼善劉綸喀爾吉善審擬鄂樂舜勒派鹽商銀
兩一案甚屬悖謬鄂樂舜之得受銀兩旣已屬實則富勒渾之參
奏並不全虛乃伊等於鄂樂舜則止照求索借貸所部財物准枉
法論加等擬以絞候而於富勒渾則照誣告反坐加三等擬以杖
流此事所重專在鄂樂舜一人同德不過附參試思鄂樂舜於眾

商銀兩既無契券又無利息又未分毫償還何名借貸又必如何而始謂之勒派得財耶自朕初年鄂善以受賄嚴加懲創意外大臣共知儆惕而鄂樂舜身爲巡撫尙簠簋不飭乃爾獨不思鄂善所治何罪而乃如此定擬反將參出之人坐以重罪則此後各省督撫或有貪婪者朕將何賴以覺察此所繫於官箴國法者甚大在尹繼善等明知富勒渾罪不至此朕必不照擬完結不過以富勒渾係大學士傳恆之姪故爲定擬過當以見伊等不畏傳恆不知朕於大小臣工功罪賞罰從無絲毫成見若富勒渾參鄂樂舜之處全虛則誠應論以反坐今惟同德一事屬虛而其事尙在疑似律有參款內一二事實他皆虛無尙有從輕之條而况富勒渾所參重款已實乃欲將其從重治罪是何意見乎且無論富勒渾不過傳恆堂姪傳恆亦斷不能爲之曲庇即使大學士傳恆設

有獲罪之處朕亦何肯少爲遷就耶伊等如此居心正乃深於畏懼揣度可鄙可愧此等伎倆能於朕前行之乎朕故明爲宣露使內外臣工輕笑此三人之無恥不能包荒之議朕有所不避矣並將尹繼善劉綸喀爾吉善俱著交部嚴加議處昔朱子論晉韓厥卻克謂委曲分謗非大臣體劉綸尙係新進尹繼善喀爾吉善多年封疆何乃出此此番奏讞實乃巧爲之分謗朕甚愧慙至此案富勒渾到任未久卽聞眾商嘖有煩言周人驥同德近在同城豈得諉爲不知同德卽無授意情事亦何以漫無覺察周人驥同德俱著革職發往軍臺效力浙江巡撫員缺著楊廷璋補授浙江布政使員缺卽著富勒渾補授其按察使員缺著台柱補授湖南布政使員缺著楊灝補授鄂樂舜卽著交與台柱押解來京到日該部奏聞請旨餘著覈擬具奏摺並發○諭軍機大臣等庫圖齊自

上年投誠以來詳報一應事宜復致信阿巴噶斯等令其擒賊贖罪甚屬可嘉著加恩授爲散秩大臣○禮部議覆衍聖公孔昭煥奏孟廟請罷季孫子叔高子告子盆成括從祀查季孫子叔爲孟子門人盆成括學於孟子見趙岐注岐去孟子近必有據孟子去齊章有高子以告之文確爲弟子無疑告子不害從祀雖見宋史然攷欽定圖書集成及孟氏三遷志皆作浩生不害改於何代不可稽見在所祀係浩子不害非告子自宋至今從祀七百餘載未便以臆說罷從之○辛亥 上啓鑾謁 孔林以定西將軍策楞奏報擒獲阿睦爾撒納命改程謁 秦陵○諭據策楞等奏伯什阿噶什等將阿睦爾撒納擒解前來等語此次擊獲叛賊阿睦爾撒納伯什阿噶什巴圖爾烏巴什諾爾布古爾班和卓貝克等洵屬奮勉朕甚嘉予伯什阿噶什朕前曾欲封以王爵著策楞卽

傳諭封爲親王其餘諾爾布等四人孰爲台吉孰爲宰桑著查明
卽行奏聞候朕酌量加恩並先諭知伊等大皇帝因未悉爾之等
級是以暫緩予封見命我等查奏到時卽有恩旨今因路遠不
能多齎賞賜物件特命御前侍衛送到恩賞伊等五人馬褂朝珠
等物策楞等卽行賞給再庫圖齊此次亦甚奮勉著加恩授爲內
大臣補授阿巴噶斯宰桑至普爾普因此事往返勤勞今又與福
昭車布登協同擒拏阿睦爾撒納著施恩授爲內大臣福昭車布
登俱授爲二等侍衛鄂勒哲依尼瑪哈薩克錫喇等勦賊俱各奮
勇除尼瑪前經封公外鄂勒哲依哈薩克錫喇俱著加恩封公吞
圖布恩克博羅特俱授爲散秩大臣此內鄂勒哲依年老不必前
來令在彼同兆惠王保辦事尼瑪哈薩克錫喇吞圖布恩克博羅
特內議留一人在彼辦事餘同策楞來京再阿睦爾撒納今已就

擒伊姊德勒格爾之妻仍遵前旨解京伊妻敦多布巴勒桑乃噶爾丹策零之女著照依達瓦齊所請賞交達瓦齊令其養贍將此諭令伊等知之又諭將軍策楞等此次自抵軍營辦理一切甚合機宜始將阿逆拏獲自應酌量施恩策楞著封爲一等公賞戴雙眼花翎寶石帽頂並四團龍補服玉保著賞三等男爵世襲罔替扎拉豐阿亦屬奮勉著施恩賞給親王職銜達爾黨阿富德辦理由珠勒都斯進兵妥協達爾黨阿賞戴雙眼花翎富德所有降級罰俸革職留任之處俱行開復又諭兆惠此次辦理事務俱合機宜著加恩授爲內大臣○達爾黨阿奏唐古忒乃逆賊阿睦爾撒納之族游牧處有精兵五六百名經將軍派調止帶兵百名駝馬疲瘦行五六日卽躲避觀望不前復探知阿睦爾撒納入伊犁欲由哈布塔克拜達克一路往從詭傳將軍兵敗搖惑眾心應速行

擒治見派富德莽阿納帶同噶勒藏多爾濟及厄魯特兵往辦報
聞○癸丑命河南山東各採買小米數萬石於江南平糶○甲寅

上謁

秦陵○免直隸山東經過地方額賦十分之三款收地

方十分之五○命巴里坤建倉貯糧○以清馥爲直隸布政使塔

永甯爲湖北按察使

由候補道遷

○丁巳諭軍機大臣等沙克都爾曼

濟未至伊遊牧之先其弟明噶特將伊遊牧搶掠沙克都爾曼濟

之子圖們尚在幼年能率眾由珠勒都斯前來投順殊屬可憫著

加恩封圖們爲貝勒賞戴雙眼翎仍賞銀一千兩爲經理生產之

貲以示體恤並令圖們卽由額林哈畢爾噶一路前往趕赴沙克

都爾曼濟令其父子完聚明噶特俟拏獲時卽委員解赴京師治

罪○戊午諭軍機大臣等據策楞等奏稱哈薩克錫喇尼瑪扎那

噶爾布等公同商議將伊等鄂拓克遊牧疆界先行區畫其各部

落無業人等並籌歸併安插等語此皆圖什墨勒等應辦之事伊等公同籌辦具有條理應俱如所議行其將來歸併安插人等生計艱窘著加恩賞給茶斤以資養贍策楞第交與圖什墨勒等查明需用數目行文巴里坤辦事大臣由珠勒都斯就近運往再據伊犁前來人等告稱瑪木特約蘇圖俱爲阿逆戕害約蘇圖圖什墨勒員缺著吞圖布補授吞圖布所遺扎爾呼齊員缺著恩克博羅特補授瑪木特年已就衰效力行閒甚屬奮勉今聞爲賊戕害深堪憫惻著加恩賞銀三百兩其公爵卽著伊孫扎木禪承襲至約蘇圖從前附和阿逆行事被禍乃其自取第念伊係準噶爾舊人海喇圖納親之孫如有子孫兄弟著策楞等查明具奏加恩將伊宰桑承襲再見在鞏獲阿巴噶斯之母及伊妻室係尼瑪諾爾布之姊妹尼瑪等旣合詞懇奏且係婦女著加恩寬宥交與尼瑪

等管轄若阿巴噶斯之子則應治罪之人不得倖邀寬典著卽查明解送來京○諭據富德奏稱領兵擊敗唐古忒已逃向哈布塔克拜塔克一路前往伊犁等語著傳諭策楞酌派兵丁速往哈布塔克拜塔克地方堵截唐古忒務期擒獲伊卽窮蹙投降亦行犒問遵照前旨押解來京治罪○晉封納噶察爲貝子○辛酉諭予告尙書魏廷珍係宣力舊臣今年將九十道左迎鑾允稱人瑞伊惟一子前經賞給一品廕生例應內外兼用著再加恩賞給員外郎職銜在家侍養以昭眷舊至意○命直省甄別佐雜等官○癸亥命山東軍流以下人犯減等發落○甲子諭鄒一桂年已衰老不勝侍郎之任禮部侍郎員缺著金德瑛補授所遺內閣學士員缺卽著鄒一桂調補○策楞等奏前侍衛福昭等報台吉諾爾布等於正月二十一日在雅瑪圖嶺擒獲阿逆詢之莫和里並未聞

諾爾布等擒賊信似福昭等所報事屬子虛但賊被回人擊敗勢甚窮蹙台吉南泰同侍衛福昭帶兵擒拏玉保尼瑪等繼進臣等大隊亦剋期齊集自可計日就獲諭軍機大臣等策楞等奏稱據伊犁脫出之莫和里告稱阿睦爾撒納於十七日被和卓木回兵擊敗十九日令伊前來等語先據福昭報稱於二十一日擊獲阿睦爾撒納莫和里於十九日前來是福昭得信在莫和里之後但福昭自二十一日以後未經續報此時曾否擊獲著策楞詳查確實卽行奏聞○衛哲治以病乞休允之以趙安恩爲工部尙書

都統

○乙丑以張師載爲兵部侍郎

革職交巡撫

○丁卯達爾黨阿奏

領兵由珠勒都斯進聞阿逆已獲准將軍策楞咨停進兵在特訥格爾駐紮辦事旋又咨臣派兵一千至安集海接應見除富德帶往辦唐古忒五百名外酌選一千卽於十七日前進諭軍機大臣

等前命薩喇爾駐紮特訥格爾會同達爾扎阿辦事今達爾扎阿已領兵前赴安集海特訥格爾一應事務亦屬緊要卽著薩喇爾率同三格辦理所有定邊右副將軍印雖經扎拉豐阿帶往薩喇爾仍著授爲副將軍俟拏獲阿逆卽遵前旨令其押解來京○戊辰寶授碩色湖廣總督郭一裕雲南巡撫○調愛必達爲山東巡撫以恆文爲雲貴總督明德爲山西巡撫調武忱爲甘肅布政使以劉藻爲陝西布政使

由宗人府
府丞遷

三月己巳朔 上至曲阜謁 先師孔子廟○諭軍機大臣等今日覽策楞等陳奏一摺俱係尋常事件其擒獲阿睦爾撒納之處並未聲明伊等前次奏阿逆業已就擒今又隔十餘日之久此際應得確信卽尙未確實亦應將見在兵已至何地去伊犁相距遠近情形奏聞何竟無一言奏及深可駭異卽如尼瑪見與玉保領

兵同進賞伊騎都尉世職俟到伊犁傳旨並未遲誤何必行文卽行辦理殊屬不知緩急今策楞旣經傳諭卽著賞給尼瑪恩克博羅特吞圖布等世職照伊等奏請之子承襲其達什車凌遊牧見被搶掠著酌量加恩賞銀數百兩遷至和博克薩里地方暫行安插仍將見在大兵所至情形速行奏聞○諭據德善等奏報烏梁海等喧傳哈薩克與阿睦爾撒納兵勢連合共相擾亂等語此皆烏梁海等捏飾謠言搖惑眾心情罪可惡伊等畏威內附全不可信此等傳言明係聽阿逆指使妄行聲張其背叛情形已露若不嚴加懲創不足以示儆戒著諭哈達哈密交和托輝特郡王青滾雜卜貝勒車布登扎布於伊等兵丁內酌量選派前往密查其爲首倡惡之人卽行正法見又據遣往烏梁海換易馬匹之副都統察達克等報稱圖布慎莽噶拉克俱卽將馬匹換易尙屬急公此

二人應加寬宥若果勒卓輝已屬首鼠兩端之人然從前尙有出力之處青滾雜卜等應詳加體察斟酌辦理至鄂木布博博等則斷不可恕務應查拏嚴究其屬人一併拏獲賞給軍前效力人員馬匹牲隻盡行收取以資兵力侍衛德善奉差時已有畏懼情形及至彼處一聞烏梁海等捏造之言不審虛實卽行退回甚屬懦怯德善著革去侍衛仍同順德訥前往哈薩克曉諭以觀後效青滾雜卜等卽將何時前往辦理之處速行奏聞○諭據阿蘭泰奏報訥默庫等已經擒獲見在解京等語此事係舒明籌畫甚屬妥協阿蘭泰一味推諉若照伊所奏辦理必致遲誤著將阿蘭泰男爵革去卽賞給舒明以示鼓勵阿蘭泰著仍交部嚴察議奏達什丕勒能計誘訥默庫前來亦屬奮勉著加恩封爲貝子解送訥默庫妻子等來京時著將阿睦爾撒納之二女從前交與訥默庫者

一併查出解送來京其剛多爾濟巴圖博羅特布顏特古斯等俱不必再行查辦訥默庫所有屬人俱著分賞車凌車凌烏巴什等嚴加約束○諭順德訥曾往哈薩克曉諭人尙明白著授爲頭等侍衛賞銀一百兩令其再往哈薩克曉諭阿布賚見在逆賊阿睦爾撒納窮蹙無聊計日就擒前阿逆曾向哈薩克借兵阿布賚並未給與深知大義實可嘉予再哈薩克屬人等亦有搶掠塔本集賽之事塔本集賽正在附和阿逆之時則伊等初非助逆行事乃正爲天朝出力翦其黨羽恐伊等不知妄生疑慮是以遣使前往曉諭阿布賚從前遣使朝貢具見誠悃如能傾心內附自當格外加恩俾伊等安居樂業永享太平伊等惟善自約束毋使屬人越境滋擾其準噶爾各部已嚴行禁止亦不得擾害該部落將此明白曉諭如阿布賚遣使入覲卽令順德訥帶領前來○兩淮鹽運

使盧見會進原任檢討朱彝尊經義考三百卷○庚午·上釋奠
禮成謁 孔林○謁 少昊陵○謁 元聖周公廟○命曲阜縣
丁丑年地丁全行蠲免○辛未 上回鑾○諭軍機大臣等據玉
保等奏拏獲阿巴噶斯屬人烏遜供稱阿逆見領厄魯特兵八千
名哈薩克兵八千名已將烏遜送往將軍營內又聞阿逆見在出
痘甚重等語烏遜乃賊人黨羽所言不過虛張聲勢旣已拏獲卽
應正法一面密告策楞何用送往軍營搖惑眾聽玉保辦理甚屬
不合且此次應卽探明福昭所報確信再行陳奏卽福昭等所報
不實或被普爾普所欺亦宜一併查明奏聞乃並無一語奏及與
策楞昨日所奏正同伊等旣冒昧於前又復遲疑不進是誠何心
卽如另摺所奏宰桑巴桑等告稱初七日阿巴噶斯烏勒木濟二
人至噶順地方見大兵到卽由山路奔竄約計初八日卽到阿睦

爾撒納處等語由此觀之阿睦爾撒納所住地方與軍營相距甚近巴桑卽係親見阿巴噶斯逃竄後來至軍營者若如其言卽行追逐早已可抵賊營何伊等行走甚速而玉保等行走甚遲至於如此懸殊謂非退縮不前而何見在賊黨巴蘇泰又復來歸則其窮蹙情形已不能支玉保等應卽迅速往擒儻再遲緩誤事斷不寬貸如阿逆果出痘身亡亦必將伊屍寸磔以彰國憲毋許草率完結○諭據策楞等奏稱據陸續逃出人等云阿睦爾撒納並未擊獲伊等誤報實屬輕忽請罪前來此亦據福昭等所報遂行奏聞雖屬不實無甚緊要但泥於僞信心思紛亂反不惟促進兵朕心殊爲忿恨再據烏遜之言惟庫圖齊沙喇薩琿二人實意投誠其餘得木齊收楞額皆恍惚難信著策楞等留心試看稍有他意嚴行辦理毋受其欺○癸酉諭軍機大臣等據策楞等奏宰桑齊

巴罕等皆陸續投誠策楞等加意奮勉作速蕲事朕甚望之至年
桑齊巴罕等雖來投誠不知曾與阿睦爾撒納合夥否儻前曾合
夥聞大兵前進始來卽應辦理此時儻或不辦將來大兵撤後恐
伊等妄生事端卽喇嘛等朕曾經降旨著策楞等至伊犁時將甚
不堪者辦理數名餘皆寬宥並給伊等印信見據投出諾爾布端
多克屬下布克給克告云阿睦爾撒納力窮喇嘛十散七八等語
可見喇嘛與阿睦爾撒納合夥亦屬真情策楞等採訪明白斷不
可寬宥此次徹底查明嚴加懲治使伊等各知法紀不敢妄生事
端方爲妥善○甲戌刑部議奏文選司書吏王明一譌索銀兩御
史許伯政不指參請交部察議得旨此案王明一恐嚇詐財雖屬
書吏舞弊小事然王安國旣聞之許伯政則當刑部咨詢之時卽
應據實指出乃以得之訪聞無從咨送聲覆以渾厚自居若非御

史李綬參奏則官吏夤緣情弊無憑根究必至賄賂公行尾大不掉卽此一事可知各部院胥吏營私之弊原未盡除而漢大臣如王安國之流者方且以是爲忠厚得體滿大臣之謬託於文者亦效尤爲之不知涓涓不已將成江河杜漸防微正當事省察至御史職司糾察風聞尙許言事許伯政旣聞王明一詐財一事並不據實指參伊等平日藉口於建言又藉口於不得盡言卽如朕初年何嘗不鼓舞言路然所陳奏不過撝拾浮詞空談塞責而因以爲奸取利者實復不少數年以來略示懲創則又箝口不言卽如鄂樂舜勒索商人銀兩一事御史中籍隸浙省者甚多豈一無聞見而竟未有一人奏及者設非富勒渾指參何由發覺在廷諸臣爲朕所倚任使人人緘默自安股肱耳目之寄朕將誰任王安國降調處分已降旨從寬留任然令伊捫心自問固應愧赧無地

諸臣有似此居心者尤當引以爲戒也許伯政僅照部議察議不足示懲著交部嚴察議奏言官等俱著嚴行申飭李綬著交部議敘○命浙江山陰等二縣加築海塘代賑○乙亥諭軍機大臣等覽策楞等兩次所奏分兵前往洪郭爾鄂博擒捕阿睦爾撒納之處尙屬近理但觀伊等情形並未迅速前進則於軍行緩急機宜茫然不曉也據陸續逃出之人俱稱阿睦爾撒納被回民和卓木擊敗勢蹙力窮在洪郭爾鄂博居住正與見在策楞等領兵前進地方相距不遠何必又分略地大隊之兵以次前進乎策楞等卽當選集勁旅合力速行及阿睦爾撒納未得逃竄之先卽行追及始與事機相協卽使逃出之人所言未必盡實或大兵馬力平常亦應急速趨赴審量賊情如賊人之力尙強則我兵暫爲緩行俟後隊旣集協力盡發亦無不可今乃未見一人卽已如此遲滯則

雖逆賊窮蹙果眞豈肯坐待策楞等兵至而束手就縛乎又豈必俟目覩策楞等到彼始知倉皇奔竄乎此卽策楞等不知事理之明驗由伊等延緩情形度之則阿睦爾撒納未必卽能擒獲試思逆賊一日不獲此事一日可了乎策楞等一何悖謬至此伊等縱計慮未周獨不思如何始可謂之竣事乎此時阿睦爾撒納儼已就縛誠爲盡善若仍未獲則此旨到日阿睦爾撒納必早經免脫或先定一竄迹之地矣如果逃往哈薩克布魯特等處斷不可虛張追逐之勢遽行撤兵卽著派達爾黨阿玉保尼瑪於索倫兵內揀選一二千名奮力追趕仍先遣人往哈薩克傳諭阿睦爾撒納乃叛大皇帝重負厚恩之逆賊今逃入汝界汝等能將伊擒獻大皇帝必重加恩賞伊或詭言逆賊到伊界內又逃往布魯特當諭以逆賊所到之處大兵當卽窮追期於必獲而後已並不騷擾

汝等汝等或稍有阻撓卽是甘與賊通我等必將一體辦理使之
知所震懾出力追捕決不可稍爲姑息朕觀外夷情形均多懼怯
卽如阿睦爾撒納如此窮蹙而伊等尙不免畏懼況我統索倫精
兵前往丕振軍威伊等無有不懾服之理逆賊萬一逃往卽遵旨
帶領索倫兵往追務獲此皆朕先事籌畫若俟伊等奏到阿睦爾
撒納脫逃時始行降旨指示必致貽誤矣總之道途寫遠一切事
務伊等當詳審應緩應急之宜而一出以果斷始能適合事機庶
叛賊可以就擒策楞等其殫心熟籌勇往辦理○諭前經降旨令
薩喇爾俟拏獲阿逆後來京今伊已回至巴里坤朕念伊自前歲
領兵馳驅殊屬勞瘁况伊犁一切情形尙有應行面詢之處薩喇
爾著卽由巴里坤起程來京○庚辰諭軍機大臣等據黃廷桂奏
吐魯番並無蒙古占據瓜州回民各願遷回並稱向與準噶爾交

納方物卽作每年貢獻等語瓜州回民遷回吐魯番一事前已降旨俟策楞兆惠於軍務凱還之便先將吐魯番一事情形會同查勘定議辦理今雖據額敏和卓繪圖呈覽著傳諭黃廷桂仍遵前旨曉諭回民今年仍令暫住瓜州俟策楞等查勘之後再爲料理遷移若此旨未到之前已經遷移則將此旨寄策楞等聽其查辦至伊等進貢方物一節當稍示區別如向隸二十一部落者卽係噶爾丹策零之人今伊犁旣經平定自應奉貢方物如原係噶勒藏多爾濟及巴雅爾等所屬此番遷回故土應仍歸伊等管轄方爲允協俟策楞等查勘之後再行詳議妥辦可也著傳諭黃廷桂知之○諭侍衛丹津此次辦理訥默庫之事甚屬出力著加恩授爲散秩大臣賞銀一百兩歸於察哈爾正藍旗安置仍交該總管照從前安置厄魯特之例賞給產業牲畜其牲畜未滋生之前並

賞給口糧一年至丹津所屬戶口及歸併居住之兄弟等並著阿
蘭泰等查出同此次賞給訥默庫之二十戶人等一併送至察哈
爾安插○壬午減江蘇上元等十四州縣衛低瘠田地額賦○癸
未諭軍機大臣等阿蘭泰等將訥默庫妻子及宰桑護衛等解送
來京著交部分別辦理其宰桑察罕鼎濟巴圖濟爾噶勒等將訥
默庫背叛情形據實陳奏著免其治罪加恩授爲三等侍衛至訥
默庫見在新娶之妻不必治罪著舒明查明係何部落所屬卽行
發還交與管轄○甲申諭軍機大臣等策楞奏稱詢據自伊犁回
至軍營之侍衛巴靈阿筆帖式圖敏等供稱伊犁叛亂時薩喇爾
見賊兵追及卽欲奔避鄂容安告伊賊來當與決戰何至奔逃薩
喇爾回稱汝何知率眾先奔班第鄂容安勢不能支旋卽自盡等
語薩喇爾與班第等同爲將軍自當一心禦賊果至勢窮力絀班

第等先以身殉薩喇爾或不得已衝突而出不能與之同死在伊
尙無足責乃竟首先奔避以至眾兵潰散是二臣之死雖死於賊
而薩喇爾亦不能無罪矣但係巴靈阿等一面之詞尙應質對著
傳諭黃廷桂於薩喇爾到肅州時卽行鎖拏慎選幹員速行押解
來京並將此旨傳諭薩喇爾知之再拏彼時黃廷桂當慎密不露
更當嚴行防備毋致彼畏罪免脫或致別生事端慎之密之拏彼
後一面速行奏聞○丁亥策楞奏大兵克復伊犁諭軍機大臣等
策楞等領兵雖至伊犁而阿逆業已逃竄此時所有伊犁應辦事
宜尙可稍緩惟當追擒逆賊爲第一要務阿逆詭計百端策楞等
屢次誤聽傳言以致首惡免脫見在策楞等皆云阿逆逃入哈薩
克境內以朕思之阿逆見與額琳沁同逃額琳沁殺掠哈薩克積
有仇隙斷無前往之理况阿逆見領兵三千餘似此大隊兵丁哈

薩克必不能容留此又係阿逆詭計揚言逃往哈薩克俟我兵往追伊或轉從別路擄掠臺站或仍至博囉塔拉塔爾巴哈台等處棲身皆屬未定策楞等務須偵探確實萬勿再爲所愚如果逃入哈薩克則仍遵前旨派達爾黨阿等領兵索取務期擒獻又如阿巴哈斯哈丹等大兵至伊等遊牧時伊等已逃回阿逆處同行今伊犁地方又不聞伊等蹤迹此時恐又回至遊牧收拾殘眾或尾出大兵之後前來抵敵或向額林哈畢爾噶等處肆行騷擾此皆不可不豫爲防範者從前達爾黨阿會奏帶兵至安集海地方直抵伊犁兆惠亦奏稱前往特訥格爾查看情形再行前進今既須分路堵截達爾黨阿不必前赴伊犁卽馳紮安集海確探阿巴噶斯等蹤迹速行辦理並著策楞派出熟悉地方情形如尼瑪哈薩克錫喇等一人協同達爾黨阿籌辦兆惠至特訥格爾後亦暫止

前進或與達爾黨阿會合一處或另至緊要處所聲援策應其北路哈達哈等亦降旨令伊等帶兵協擊策楞務互相通信聯絡聲勢以期弋獲至奏稱詢問阿逆處逃出之人告稱敦多克曼集德濟特等俱欲擒獻阿逆見已遣人前往等語此語必不可信敦多克曼集等與賊聯爲一氣交結甚深焉肯卽爲擒獻其爲詭計無疑而策楞等卽信以爲真遣人前往無怪乎其屢被欺而不自覺也卽阿逆見帶兵三千之說亦係詭言聲張伊兩次被回人擊敗烏合之眾已無多如果兵力尙盛何以一見大兵卽行逃竄並不敢稍爲抗拒此亦不能無疑者朕所指示乃揣度形勢而言若策楞等身在彼處更應確有所見且鄂勒哲依哈薩克錫喇尼瑪吞圖布等俱係熟悉彼處情形之人策楞等務宜公同籌酌計出萬全但期適合機宜亦毋庸拘泥朕旨至塔本集賽人等前已附

和阿逆此時阿逆若仍至博囉塔拉塔爾巴哈台等處應將此等人先行辦理不許仍蹈前轍或遷至伊犁安插其伊犁眾喇嘛等反覆無常必須從重辦理方知儆戒俟擒獲阿逆後策楞等酌量擒拏懲治又諭策楞分路擒拏阿逆事宜已詳悉降旨令伊等遵照辦理其北路哈達哈等所領兵丁見在往辦烏梁海事務著傳諭哈達哈伊原係副將軍所有同往之青溪雜卜車布登扎布並著授爲參贊大臣並將扎木禪察達克二人帶往俟辦理烏梁海事竣卽在彼處候旨或策楞處寄信到時阿逆如逃往博囉塔拉等處卽領兵由彼處進發協同擒拏若逃入哈薩克境內亦帶兵至哈薩克邊界駐兵遣人索取務令其速行擒獻其烏梁海等阻止德善前往哈薩克之處必係聽阿逆指使務確訊實情卽行奏聞○辛卯諭軍機大臣等策楞等兵抵伊犁見伊等部落人眾久

遭塗炭生計極爲艱窘今阿睦爾撒納卽日可以就擒則厄魯特之眾皆我奴僕未忍坐視其困且恐伊等窮苦急迫不免搶奪滋事自應豫籌體恤之道已降旨策楞等分別賞給糧茶牲畜以資資贍其有力能就食者卽著自赴巴里坤領取以省輓運之煩並令兆惠同至巴里坤會同和起豆斌等料理傳諭黃廷桂吳達善酌撥糧石茶封及牛羊菜馬之屬運送巴里坤聽兆惠等酌量存留軍營並轉送伊犁該督等務須多爲籌備作速辦理卽將撥運數目一面知會兆惠一面分晰奏聞○諭據哈達哈奏散秩大臣達什車凌都噶爾帶領伊等集賽人眾歸附前來等語達什車凌都噶爾帶領人眾前來甚屬可憫今當播種之時卽著伊等在阿爾台以外尋可耕之地居住趕行播種又恐伊等遠來盤費不給著加恩賞給三箇月口糧令伊等派人運往將此傳諭哈達哈等

曉諭伊等使知朕恩○免浙江仁和縣十六十七兩年民欠籽種
○壬辰 上謁 昭西陵 孝陵 孝東陵 景陵至 孝賢皇
后陵奠酒回鑾○策楞奏兵至喀喇烏蘇招降額琳沁等適據玉
保咨稱阿逆窮蹙即可追及擒獲所有伊犁收集流亡撫慰喇嘛
安插失業貧人等事臣見移駐固勒扎經理諭軍機大臣等策楞
等奏稱玉保等見在將次追及阿逆伊即領兵回至固勒扎等語
策楞等錯謬已極阿逆旣已力窮無庸大兵深入伊等應分隊往
追何必亟亟回至固勒扎此實朕所不解且摺內並未將玉保等
相距阿逆遠近之處及阿逆究向何處逃遁一一聲明而僅以收
服一額琳沁爲足了事是全不識事之輕重且伊等從前誤信福
昭等孥獲阿逆之言即將巴里坤解送馬駝檄行停止以致軍營
遲緩今又將布庫努特一小人所告之言信以爲實焉知又非阿

逆從中肆其詭詐緩我大兵之計策楞等一誤再誤必致阿逆遠颺伊等束手無策而後已其回至固勒扎若云撫定伊犁則伊犁自昨歲已經平定所有無業蒙古亦伊等附和賊人自取窮困何必急於料理且鄂勒哲依見在卽至彼處儘可交與辦理豈必待策楞親同籌畫如因兵丁馬力平常則見在旣無庸大兵深入卽揀選馬匹酌帶二三百名前往未始不可策楞卽欲撤回亦應派扎拉豐阿在彼策應伊領兵前往所爲何事今阿逆尙未就擒卽已撤兵又安用此將軍參贊爲耶看今日情形則阿逆必已竄入哈薩克境內策楞等務遵朕節次所降諭旨著達爾黨阿玉保尼瑪等迅速前往哈薩克邊境索取毋得少生退諉並曉諭伊犁台吉宰桑等受阿逆暴虐今雖脫逃仍不得安然無事大兵一撤伊必前來滋擾責令伊等協助大兵窮追極捕以絕根株方爲一勞

永逸之計其北路哈達哈等協力擒拏之處昨已詳悉傳諭此時
阿逆若逃入哈薩克中途或搶掠新收之烏梁海等或煽誘鄂木
布等將察達克等遊牧騷擾均未可定哈達哈務於逆賊未到之
先卽將烏梁海鄂木布等悉行擒治以杜後患事竣卽遵旨帶兵
往哈薩克地方索取阿逆再從前遣德善往哈薩克中途退回實
屬怯懦若此時阿逆果逃入哈薩克地方著哈達哈卽將德善在
軍營正法以爲畏葸債事者戒○江西巡撫胡寶琬奏廣信府封
禁山原名銅塘山周三百里與閩浙連界由上饒境入山近山舊
設六汛山徑險峻攀藤援木方可登陟澗水瀾漫前代無不封禁
有議開者勘明旋已誠以無可墾之地無可取之材乞試土無礦
苗稍藏奸徒便難裹脅投別募開集役勢必添官駐防斷難孤處
禁則無棄利開則貽後害永宜封閉至稽查之法設碑隘口指定

六汛分管責成居民亦禁竊入樵採以杜其漸其閩人倚傍搭蓬者奸良莫辨應令遷移界外有假稱山主招留者嚴究得旨如所議行○丙申諭鄂樂舜身為巡撫勒派商銀至六千餘兩當此法紀肅清之時鄂樂舜歷任封疆乃敢簞簋不飭敗檢負恩一至於此卽應明正典刑以示炯戒但念其情節尙非因事枉法可比著從寬免其顯戮賜令自盡○策楞奏據自阿逆處逃出之人續報大兵至和爾郭斯已據津梁阿逆不能渡河僅依沙岡自守各路兵皆會逆眾不願同逃等語又據鄂勒哲依報知途次聞福昭之信未確已集兵擒察哈什解京率兵急進下部知之○丁酉上還京師○諭魏廷珍簡任中外宣力舊臣年近九旬允稱人瑞今率迎鑾道左朕親召見行殿加以優遇復賞給伊子員外郎職銜令其在家侍養以昭眷舊至意乃忽聞溘逝深可惻惻應得卹典

著察例具奏尋予祭葬諡文簡○調吳士功爲湖北按察使塔永甯爲陝西按察使○江蘇巡撫莊有恭奏沿海州縣地僻米販本少米價昂至三兩四五錢已確訪臺灣上年豐收米價平減請照十六年浙省歉收奉旨暫弛海禁准令臺灣商販運江於出口給印收口驗數秋收停止得旨此事有許多不便處江省非如浙省之界連閩省而且浙省所通者不過福建之內地今汝則思及臺灣海面風信靡常遠不救近無論海禁一開諸弊叢生且卽令降旨諭部部文到福建督撫下行至臺灣則亦將及秋月此必地方有此言而汝以爲救災愛民之舉朕未有不行者故爲此奏耳不知事當據理據實慕虛名而多損少益之事初年或有好名之心今則經事久而見理真不爲此矣

夏四月戊戌朔諭朕前因策楞等奏擒獲阿睦爾撒納當加恩賞

給伊等官爵後知此事屬虛伊等具摺請罪方值進兵追襲不加重譴冀其奮勉擒拏不意仍致免脫深負朕恩所有官爵著毋庸賞給○諭軍機大臣等寬策楞等所奏阿逆果已逃竄朕早料伊等不能擒獲必致遷延逃避伊等尙何顏更爲陳奏聞登努勒台地方水草充足牧放甚宜著策楞等領兵赴彼處駐紮俟一月後選集兵丁遵朕前旨交與達爾黨阿等前往哈薩克辦理如先遣人往諭則非僅委一偏裨可辦卽著玉保同恩克博羅特選索倫兵五六十名先行傳諭仍派兵一二千名隨後繼進玉保係專任追捕阿逆之人乃並不親行僅令烏勒登等前往致逆賊免脫此次前赴哈薩克若仍不知奮勉斷不姑貸○命陝甘總督黃廷桂赴巴里坤○己亥諭策楞等誤報阿睦爾撒納就擒一事不加詳審遽爾飛章入告固可駭異然此實由克呀特率桑誤聽巴顏得

木齊之子俄羅斯所傳展轉馳報一如得之目覩遂孟浪騰布其咎尙屬可原及既知所報屬虛而大兵將抵伊犁與叛賊相距甚近若彼時疾馳倍進振作軍聲亦何難掩獲乃策楞扎拉豐阿並不身先督率而以追捕專委之玉保令其前驅玉保又僅令烏勒登尼瑪追至庫隴癸嶺獲一額琳沁而返遂若足以塞責阿逆轉得飄然遠颺竄入哈薩克界內在叛賊詭計多端而諸臣一無調度朕早料其必致奔軼屢經降旨訓責而道遠往返亦已無及天下事原難豫定使諸臣果竭盡智能而或失之意外則亦無可如何卽當驚鼠已遠而窮力以追則亦自盡人事乃漫不經心彼此玩誤是叛賊之遁迹遠引實意中之事而非意外之事矣若謂馬力疲乏則叛賊之馬何獨不疲乏耶卽如多果魯特之伊勒都齊和碩齊等係在我大兵之後又何以轉能尋蹤前往耶更可異者

王保兵過伊犁不遠並不見賊僅據逃兵之言謂賊已窮蹙即馳
劄策楞達爾黨阿等以爲叛賊困窮無煩大軍深入而策楞等亦
遂不權輕重遽爾返旆以安輯伊犁爲詞不知伊犁乃久經撫定
之地有何可辦况經阿逆蹂躪之後所存者飢羸殘弱將軍一至
不過環向乞食而已國家撫御中外固不惜加恩惠養然此等蠢
夷賊至卽從賊去來歸迴非內地赤子可比乃不以擒賊爲事而
沾沾爲殘眾謀其家室豈不謬耶策楞前經獲罪至一聞阿逆逃
竄稍知奮勉卽速前進朕加恩授以將軍重任伊當竭力圖報乃
不審機宜緩急措置失當若此總之用兵準噶爾原非朕本意豈
以無集事之人也然其始也車凌車凌烏巴什等款關內附不得
不爲之經理遊牧以爲久長計而兩朝未竟之緒機有可乘於
事勢又有不容坐失者初非窮兵黷武啓邊釁而勤遠略也迨大

軍所至未折一矢諸部爭迎伊犁悉定此可見上蒼之默佑有不期然而然者至於阿逆負恩竄匿忍心怙亂人所切齒然不過一逃囚耳與此事大局全無關礙譬如獵場中走一狼脫一兔但當以眾人分路捕技竟至竄逸豈不可笑可恨哈薩克前經通使及奉朕敕諭情甚歡欣恭順阿逆卽求託迹其反覆詭詐伎倆人所共知豈肯容納是尙不能及從前羅卜藏丹津之投準噶爾見已傳諭哈薩克令其協力擒獻自可計日授首惟在事諸臣之辦理不善節節錯誤則殊出情理之外朕於用兵之初所以遲回未決者原慮諸臣非任事才乃今天心垂相如此而諸臣行事不惟不能仰承竟往往相左果不出朕所慮甚爲愧懣所有策楞扎拉豐阿玉保本身之罪俟叛賊就擒後再酌量分別另降諭旨將此通行宣諭中外知之○諭軍機大臣等阿逆乘閒逃竄皆由策楞等

偃然自廢坐失機宜卽以擒獲額琳沁一事而言伊等旣已誘致額琳沁伊所屬人內曾有肆爲妄言者卽當擒拏辦理取其牲隻以壯我兵力乘機卽速往追乃展轉遲疑貽誤時日坐視阿逆漏網其本意原不亟亟以追擒阿逆爲事也朕已降旨明白指示策楞接到此旨可卽遣玉保恩克博羅特先行隨令達爾黨阿領兵繼進策楞等亦隨達爾黨阿之後帶兵聲援儻仍復如前中止伊等之罪亦可自知毋庸朕多降諭旨再玉保曾行文策楞停其前往似伊一人卽可任擒賊之事惟恐策楞與之分功何以竟致奔竄著傳諭詰問玉保再福昭策布登等已回伊等呈報擒賊時旣稱得之克喀特宰桑亦宜究問俄羅斯等因何妄報及係何人指使之處一一具奏又諭前命兆惠赴巴里坤辦事後仍會同策楞領兵前進今擒拏阿逆一事已令玉保達爾黨阿等帶兵向哈薩

克索取見在伊犁無事策楞所辦事宜全無成竹兆惠至巴里坤
辦竣事務卽速來京將伊犁及軍營情形詳細奏聞候朕面授方
略再往軍營○庚子諭軍機大臣等達什達瓦之妻見已病故著
公明瑞馳驛前往率同侍讀學士富森土默特台吉喇嘛扎布等
奠醢茶酒並加恩賞銀二百兩經理喪事其所屬人眾著編爲三
旗移住阿爾台地方交與舒明阿蘭泰等善爲經理散秩大臣鄂
齊爾布林托里俱著授爲總管其宰桑爾瑪克察罕庫本們都巴
雅爾博羅呼爾哈阿爾該默濟格等俱著授爲副總管其應補授
參領佐領及編設旗分事宜一併妥協辦理具奏請旨所有達什
達瓦之弟伯格里屬人亦著鄂齊爾等管轄○辛丑諭軍機大臣
等此次追拏阿逆內大臣鄂勒哲依哈薩克錫喇俱屬奮勉見在
逆酋未獲本非論功之時但伊等係新降之人應加恩以示鼓勵

鄂勒哲依由珠勒都斯進兵向各鄂拓克集兵四千餘名奮勇協力哈薩克錫喇曾擒察衮父子今復將賊黨克什木等擒獲俱能感激朕恩實心效力甚可嘉予鄂勒哲依哈薩克錫喇俱著加恩封授公爵至吞圖布管解賊黨明噶特舍楞等至軍營時中途遇見伊母相聚賊人乘閒脫逃吞圖布係特授爲圖什墨勒辦事之人乃至疏縱賊黨本應治罪第因母子相見偶爾疏忽致令賊人奔竄尙非出於有心著從寬免其治罪前已令玉保帶同恩克博羅特前往哈薩克吞圖布亦著同往以贖前愆○策楞等奏獲賊黨克什木洪郭什俄羅斯等解京報聞○賞員外郎唐喀祿副都統銜授領隊大臣赴北路軍營○壬寅諭軍機大臣等策楞等前經調取噶勒藏多爾濟等前赴伊犁今逆賊已竄伊犁無庸前往噶勒藏多爾濟等遊牧俱有應辦事宜且令伊等得以休息卽各

處台吉宰桑等邇來俱宣力行走其各鄂拓克人等應照舊管轄及時耕種以資生計俱著回至各遊牧毋庸隨將軍等前進俟有用伊等兵力之處再行調取至二十一鄂拓克已授圖什墨勒管轄卽著鄂勒哲依等善爲安撫毋使失所亦不得滋生事端方爲妥協此次台吉諾爾布尙屬出力伯什阿噶什亦並未從逆應加恩封賞策楞等卽會同鄂勒哲依等將如何加恩之處奏聞請旨至阿玉錫擒拏克什木甚屬奮勉伊爲賊人戕害著擇其子弟一人補授收楞額並加恩賞給藍翎永遠食俸○諭玉保等奏稱多果魯特之伊勒都齊等俱隨阿逆潛逃又扎薩克薩喇勒至鄂勒哲依處搶奪物件經扎那噶爾布拏獲等語薩喇勒原係阿逆黨羽今又肆行搶掠久之必且從賊著卽行正法諾海奇齊克係與薩喇勒同來投誠之人亦應留心防範扎那噶爾布殊屬可嘉卽

著將薩喇勒戶口牲隻賞給至伊勒都齊等挈其游牧尙能追及阿逆與之同逃則可知前此玉保等追緝不力之罪百蒙難辭伊等尙欲諉卸於厄魯特等殊屬無恥不知尼瑪亦不過因其熟識道路令其前往至擒拏逆賊豈可專委於一二新降之人望其奮勇出力乎朕於此事實不勝憤懣此次若仍前退怯必將玉保等從重治罪○丙午諭軍機大臣等策楞等奏稱哈薩克錫喇告稱伊犁地方窮困不能取辦兵丁口糧請移駐崕吉斯地方等語伊犁地本荒僻原非駐兵要地且經阿逆騷擾之後情形更屬不堪但見在大兵在彼原爲擒拏逆賊並非久駐之計策楞等旣知難以駐兵卽應籌畫前進速擒逆賊乃僅以一奏了事意謂如此便可作撤兵之計是伊等全不以擒賊爲事一味畏難退縮深可痛恨又如遣使哈薩克一事哈薩克錫喇尼瑪等俱不遣率桑前往

僅請派一二得木齊收楞額等看來伊等俱不免有推諉之意前降旨令玉保帶領恩克博羅特吞圖布等傳諭索取伊等儻不能奮往從事不必令其先行著達爾黨阿領兵前往玉保帶領伊等隨後繼進務期擒獻毋負委任至鄂勒哲依由珠勒都斯進兵拏獲察哈什掠其戶口牲畜察哈什係附從阿逆之人應行辦理著卽將所獲戶口牲畜賞給鄂勒哲依至其收取諾爾布敦多克屬人一事殊屬非是諾爾布敦多克係同薩喇爾前至吐魯番投誠之人何以將伊屬人收取且鄂勒哲依見辦圖什墨勒事務諸事俱應秉公始可服眾著策楞傳諭鄂勒哲依令將此項人等卽行給還伊果實心效力將來自當從重施恩○丁未吏部等部議覆湖南巡撫陳宏謀奏衡州府衡陽縣地廣民稠訟案繁多該府同知通判同城同知止司捕務應裁併通判管理於府城內添設知

縣一員分管東南兩鄉一切錢糧從之定縣名曰清泉○戊申吏部議准署山東巡撫白鍾山奏新改曲阜縣知縣一缺請作爲在外題缺於通省知縣內揀員調補得旨吏部議覆白鍾山所奏曲阜縣知縣改爲題缺一本闕里爲毓聖之鄉自唐宋以來率以聖裔領縣事夫大宗主鬯旣已爵列上公而知縣一官專以民事爲職奉法令則以裁制傷恩厚族黨則以偏私廢事甚至因緣爲奸簠簋不飭者有之且亦非古人易地而官之道我國家尊崇聖遠邁前朝廷恩後葉有加無已豈於此而有靳焉但與其循舊制而致瘵官有乖政體何如通變宜民俾吏舉其職民安其治於邑中黎庶孔氏族人均有裨益著照該部所議行其見任世職知縣旣已謝事若歸部改銓恩及其身而止於朕心猶有未愜著加恩授爲世襲六品官仍令揀選充補用副朕重道崇儒之意○己

西諭軍機大臣等前據玉保奏稱阿逆由庫隴癸嶺逃入哈薩克境內伊回至固勒扎商同策楞等或領兵前進或遣使索取等語而策楞等隨後奏事數次總未籌及作何擒拏逆賊之處所有遺珙集圖前往哈薩克之語究竟前往與否亦未奏明伊等見在作何籌畫彼此不相照應前後又復矛盾深可痛恨已節次降旨訓示今玉保又奏及拏獲賊黨明噶特舍楞等遣人解赴軍營因策楞未與相見乘閒脫逃其意以明噶特等脫逃係策楞疏忽所致與伊無涉此等不過附和逆賊之人無關緊要原可不必深究乃玉保輒爲此奏則是與策楞等顯有抵牾情狀伊等不知和衷共濟協力擒拏首惡各懷意見形諸奏牘實爲深負朕恩看此情形必不能望伊等奮勉出力殊不知逆賊無論竄往何處必當窮搜極捕明正典刑以彰國憲策楞玉保等能自知罪愆痛改前非尙

可加恩寬宥儻仍各挾私見貽誤大事朕亦任其自取毋庸多諭
○壬子諭軍機大臣等策楞等領兵擒拏阿逆事事舛謬全無籌
畫今西路專任達爾黨阿北路專任哈達哈伊二人尙屬勇往著
卽領兵前赴哈薩克務期擒獻見據兆惠奏稱特訥格爾安濟海
共有兵二千餘名巴里坤亦有可用馬匹二千等語著將特訥格
爾等處兵丁交與達爾黨阿帶領並著和起等卽將馬匹解赴應
用哈甯阿鄂實俱著在參贊大臣上行走○諭策楞等奏台吉諾
爾布等隨同大兵效力甚屬奮勉等語諾爾布庫布察罕昆都斯
車克爾等俱著加恩封授公爵烏巴什特古斯哈什哈額琳沁扎
布貝克博勒巴里巴桑等俱著授爲扎薩克台吉鄂畢特宰桑丹
津之子訥默庫前已補授宰桑並著授爲散秩大臣再據奏額爾
克騰得木齊格存見領三千餘戶額爾克騰宰桑事務已令尼瑪

兼管格存應作何加恩著策楞等議奏請旨其額爾克騰舊宰桑
俄羅斯見在何處一併奏聞○癸丑諭見在西路軍營策楞玉保
等辦理諸事乖張錯誤種種不合機宜無以宣威荒服著大學士
忠勇公傅恆馳驛卽赴額林哈畢爾噶一帶整理軍務令眾台吉
等齊集會盟事竣卽速回京○諭軍機大臣等朕因策楞等所辦
事宜種種乖謬是以命大學士公傅恆前往整飭軍務策楞玉保
著拏解來京治罪策楞之子特通額著革職交達爾黨阿軍前效
力扎拉豐阿身爲副將軍一籌莫展本應一體治罪姑念伊未經
更事且係蒙古著革去郡王加恩給貝子品級來京候旨並諭鄂
勒哲依哈薩克錫喇吞圖布恩克博羅特等今因將軍大臣辦事
錯謬革職拏問伊等生長準噶爾地方熟悉厄魯特哈薩克情形
理應奮勉出力乃遣使哈薩克一事並不實心商辦彼此推諉伊

等俱不能無罪但念新降之人姑從寬免嗣後如能感恩圖報奮力贖罪仍當加以厚恩儻稍退諉亦不姑貸○諭烏勒登係獲罪之人經朕遣往軍營稍著勞績加恩賞給副都統銜伊當感激朕恩諸事奮勉乃於阿逆竄入哈薩克並未窮追坐令免脫罪何可追烏勒登著卽於彼處正法○策楞等奏據回人總管阿底斯等告稱布拉呢敦霍集占等向與葉爾羌喀什噶爾有隙見將回人並我等妻子移住庫車賽哩木濟木薩一帶居住若遣使招撫自必投誠移至吐魯番等語查回人素受準夷役使今舍伊犁而去必不願回應卽派員同阿底斯等前往招撫令伊等移住吐魯番報聞○授公明瑞副都統銜往西路軍營○甲寅諭軍機大臣等朕因西路領兵大臣策楞等辦理乖張特命大學士公傅恆前往經理並拏問策楞等治罪其北路專任哈達哈等協力擒拏阿逆

迅奏膚功今日哈達哈等奏到辦理烏梁海一摺尙未合宜烏梁海等反覆無常全不可信見在有逃竄情形明係豫聞風聲欲隨阿逆遁去必須速行剿滅哈達哈勿少遲疑卽行辦理收其牲畜以益兵力方足以示懲儆阿逆煽同哈薩克威脅烏梁海等潛爲構釁因而搶掠察達克等游牧則並舊日收服之烏梁海皆爲搖動不若早爲殄滅庶可以杜後患再伊等見已進兵二千名尙餘兵若干哈達哈卽同青滾雜卜迅速前往見在牧草發生務多帶領兵丁二三千名陸續進發以壯軍威若哈達哈等一面辦理一面卽速行奏聞○諭參贊大臣富德領兵擒拏唐古忒甚屬奮勉此時諒已擒獲卽或竄逸亦非阿逆可比毋庸再爲追逐富德著卽來京面聆諭旨再往軍營○命戶部尙書阿里衮軍機處行走○丁巳諭策楞等統兵追捕逆賊阿睦爾撒納旣已直抵伊犁

相距甚近乃不振我軍威疾馳前進以擒賊爲事一接玉保劄致
卽回駐伊犁而玉保雖追至庫隴癸嶺僅獲一額琳沁而返其額
琳沁屬下之人仍皆相隨叛賊以去由此觀之若使策楞玉保等
早能奮勇協力急行追捕則叛賊斷不至遠颺卽玉保當額琳沁
就縛時更能取其屬下馬駝以濟我師行之用竭力窮追尙亦不
難掩獲卽使失之意外其所擒戮必不止一老邁之額琳沁而已
也此何等重務而乃展轉延緩坐失事機前已明降諭旨宣示中
外矣夫以叛賊伏處重地尙且交臂失之今已竄入哈薩克境內
其去已遠卽遣使傳諭哈薩克其縛獻與否舉未可知是應懾以
兵威曉以大義而先遴選勇敢將弁將命以往或庶幾耳而策楞
等奏稱恐哈薩克羈留我使致開釁端欲遣哈薩克之俘留於厄
魯特者令其前往如此措置豈不褻朝命而貽笑於諸厄魯特耶

庸懦之人將有以策楞等爲曉事者不知事在人爲今未遣一人未發一兵是所謂自盡自棄耳卽以國家經費言之雍正年間兩路用兵費帑七千萬今未至二千萬也而府藏充盈較前轉多且朕並未因用兵加徵賦稅剋減兵餉而賑恤更較往時爲過優何至策楞等爲國惜費耶不過以惟怯思家之心託爲忠良爲國之言耳如是則人誰不能國家何賴有是臣乎是以特命大學士忠勇公傅恆馳驛前往將伊等擎問治罪並至額林哈畢爾噶一帶令眾台吉等齊集會盟以宣布威信整飭軍務茲以傅恆起程後二日據策楞等奏稱奉到朕三月初七日訓飭之旨已自知罪戾畏懼惶恐卽日率領官兵調集各台吉人馬直壓哈薩克邊境勒令擒獻如叛賊逃往布魯特卽至布魯特索取等語是伊等旣已厲兵深入比傅恆到軍營時策楞等進兵一月有餘斷無復行追

還之理所欲會盟之台吉宰桑等任事之人又俱隨往軍前正在用兵之際亦未便齊集會盟大學士傅恆亦無庸前赴卽回京贊理機務策楞等軍前見有達爾黨阿同往一切機宜自應商酌而行或因有此番懲儆策楞等知所奮勉叛賊得以就擒亦未可定此亦視伊二人之福命矣卽如馬匹一項見奏稱就各鄂拓克湊集二千五百餘匹則前此亦並非無馬直以畏怯不欲辦理耳近據富德奏到追殺叛賊唐古忒至塞伯蘇台地方遇哈薩克一千餘眾我軍以索倫兵三百餘直前衝突悉皆潰散斬三百餘級所獲軍械牲隻甚多此亦可見哈薩克本非勁旅策楞等畏怯自誤是以望而卻步耳總之叛賊之逸竄由於策楞玉保二人旣已誤之於前罪無可追今知畏罪思欲奮勉姑留一綫予以自贖之路視此番效力如何再降諭旨朕用人行政不存絲毫成見如伊

等果能擒賊奏功尙可相抵但恐伊等初念迫於畏懼轉念又復游移後力不能自振則朕雖曲加寬宥亦不能也將此通行宣諭知之○諭諾爾布見已病故著加恩將伊子達瓦藏布承襲公爵從前隨同阿逆之賓巴因係諾爾布之婿懇請帶往遊牧今達瓦藏布尙在幼年賓巴斷不宜留於彼處著扎拉豐阿等拏赴軍營正法○辛酉諭軍機大臣等阿逆見竄入哈薩克境內西路命達爾黨阿北路命哈達哈等各領兵索取阿逆或逞其狡謀詐言哈薩克縛賊擒獻引兵深入設伏以待皆不可不豫爲防備達爾黨阿等領兵前往卽哈薩克有擒獻之言亦仍宜擁兵自衛多方防範毋冒昧以墮奸計方爲妥協見在富德追襲唐古忒等所遇哈薩克兵丁係受阿逆慫恿搶掠塔本集賽噶勒雜特等遊牧在阿逆之意無非欲使哈薩克有得罪天朝之名而伊因得潛竄彼處

以爲藏身之固是以特降諭旨曉諭哈薩克阿布賚令擒獻逆賊不特將搶掠塔本集賽等事槩免究問尙當加以厚恩並將富德等所獲哈薩克屬人二名卽行遣回達爾黨阿等接到諭旨卽先遣幹員同伊屬人前往詳悉傳諭仍帶兵速行進發責令擒獻○諭左部哈薩克阿布賚曰逆賊阿睦爾撒納勢窮力竭竄入爾哈薩克境內又煽惑爾屬人等搶掠塔本集賽噶勒雜特等遊牧誘令爾等獲罪天朝伊得以棲身爾境苟延殘喘今爾部邊境人等誤信其言私相劫掠遇大兵擊敗擒獲爾屬人呼岱巴爾氏額塞爾拜二人解送來京詢問知爾固不知情也應卽將此二人正法念爾部落向屬恭順不過屬人誤聽阿逆之言是以格外加恩將爾屬人釋放遣回並齎賞內段四匹從前侍衛順德訥奏稱爾欲受天朝厚恩遣使進貢後使人爲阿逆所留未經入覲朕已早鑒

爾誠惻此次接到諭旨卽將阿逆擒獻不特搶掠塔本集賽等事
槩免究問仍當加以厚恩見遣兩路將軍等領兵萬人將抵爾境
爾等儻墮賊計迷而不悟不卽擒獻則必更發大兵盡行剿滅爾
其熟審利害毋貽後悔○癸亥諭侍郎雅爾哈善劉綸俱著回部
辦事不必兼軍機處行走侍郎裘曰修著在軍機處行走○諭準
噶爾部眾曰前因將軍策楞等疏縱逆賊遷延觀望辦理一切事
宜諸多未協是以特命大學士忠勇公傅恆前往軍營與爾各部
落台吉宰桑等齊集會盟整飭軍務卽如策楞等派爾等各鄂拓
克兵丁隨營出征朕念爾等屢遭兵革生計艱難特降旨令歸各
游牧休息耕種其軍營支用爾等馬匹牲隻並令給予價值以示
體恤今策楞等自知前愆業已領兵前進爾台吉宰桑等亦有效
力行聞者不便更因會盟之事久候時日見已停止大學士公傅

恆前往用頒諭旨詳悉曉諭爾準噶爾地方連年不靖互相劫奪各部落生計自不能饒裕然能及時播種牧養牲畜以務本業則一二年閒元氣自可全復若徒以搶奪爲事則有業之戶一被搶奪卽成貧乏甚至從而效尤盜賊日熾勢將何所底止因思有無相恤貧富相通卽爾部落中原自有可以通融籌辦之道果能收養貧人使其耕作自給則眾人皆可不致失所久之自成善俗爾台吉宰桑等務期約束所屬禁止劫奪辛勤力作互相調恤副朕子愛羣黎之意至於衣服制度不妨仍其舊俗若因歸順天朝必盡用內地服色勢亦有所難行爾等習慣自然一時豈能驟易且將舊時衣服盡行棄置亦殊非愛惜物力之道卽朕所頒賜物件亦止宜善爲收貯傳之子孫惟來京朝覲暫時服用見在喀爾喀蒙古王公及居住青海之厄魯特等平日各居遊牧止仍其舊惟

來京及赴園場廬從時始易服色爾等俱可做照而行朕令爾各
部落等編立旗分設官授爵其制卽與爾部設立宰桑得木齊收
楞額之意大略相同從前爾等不知妄生疑懼或謂難以奉行應
再行明白曉諭使人各奉約束勿滋事端方可永享昇平之福爾
台吉宰桑等皆受朕厚恩惟仰體朕一視同仁之意善爲撫綏庶
幾所屬人等皆知守分安居休養生息朕實有厚望焉○諭策楞
奏諾爾布敦多克及伊子達瓦俱已病故深堪悼惜著賞銀二百
兩辦理喪事其公爵卽著伊幼子巴雅爾拉虎承襲○乙丑命何
國宗專辦西域輿圖事務劉統勳卽馳驛回京○丁卯諭軍機大
臣等據策楞等奏稱玉保領兵前赴察罕烏蘇追尋阿逆蹤迹達
爾黨阿等由博囉塔拉進發俟至勒布西特喀木哈達處會齊一
同前赴哈薩克又策楞等因籌辦官兵馬匹口糧暫駐於登努勒

等語觀此可知此次仍是玉保一人領兵前赴哈薩克而策楞等並未繼進夫策楞扎拉豐阿身爲將軍不親自前往反令玉保獨行是誠何心是將軍之去反不如玉保之去爲有益耶况玉保原係需人提調指揮之人伊得意則進失意則退策楞等諒所深悉豈以玉保擒獲逆賊則專屬玉保一人之功設令無功獲罪策楞等身爲將軍又可脫然事外耶策楞等甯不計及此而冒昧妄行朕實爲之不解伊等摺內有仍懇朕慈鑒之語試問以如此行事尙欲邀朕憐憫豈但知乞朕加恩竟不自忖作何承受耶總之伊等前奏欲赴哈薩克之意特因朕嚴旨催促迫於不得不然姑勉強從事及稍加溫諭卽自延緩不前殊不知朕所矜憫者乃行閒兵弁及哈薩克錫喇尼瑪等新來歸附之人此際殊覺勞苦耳豈

謂策楞等受任將帥不能奮身前進至於數數僨事轉得邀恩耶
策楞等身膺重任理應勇往直前有進無退乃必待朕降旨督促
方圖前進否卽退縮不前會不思道路遙遠軍中事宜若必待朕
一一指示而後奉行詎能望其成事卽如官兵口糧一事當向巴
里坤領取不應向厄魯特湊辦去歲用兵時準噶爾人眾尙未困
敝原可因糗於敵且大兵不久卽還亦非久住而永常情然不知
必斤斤以計日授糧爲辭朕是以斥其非而加之罪今歲用兵則
諸部落當阿逆擾亂之後事勢與前大異不但派往哈薩克之兵
當以接濟口糧爲要卽駐伊犁等處兵丁亦當由內地運給口糧
豈可轉向厄魯特等湊辦在將軍惟當迅速進兵至所需口糧何
難向巴里坤領取卽令不能剋期全到且先趕運兒馬騾馬其羊
隻隨後運送有何不可而策楞並不籌辦前後奏摺亦無一言及

此豈不重堪駭怪乎且準噶爾人眾俱我臣僕伊等生計艱難猶當施恩賞賚何至索及伊等牲隻策楞等如此湊辦牲畜派撥各鄂拓克兵丁全不知事體輕重尤屬悖謬不堪又此次派往哈薩克之兵自可就見有之兵酌量調度毋庸更爲徵派如富德帶兵三百卽能擊敗哈薩克一千之眾伊等獨未之見乎我兵抵哈薩克時彼若卽行縛獻阿逆則已否則量我兵力或可急進或應徐圖總在相度機宜隨時辦理何可豫存拘牽之見策楞等並不審量事勢而率意乖舛若此朕實不勝詫異再覽伊等所奏並未言及伯什阿噶什見在何處從前伊與阿逆頂佛結盟同惡有素此時保無私相糾合阻撓我師尤宜先事防範著達爾黨阿細加偵訪如伯什阿噶什已向內地遷移並無他故自可無庸辦理儻有別情卽先將伯什阿噶什擒拏取其牲隻助我兵力然後前赴哈

薩克庶可翦除阿逆羽翼使無他患今擒拏阿逆之事業經屢降諭旨責成達爾黨阿當善體朕意奮勉出力速圖奏功若策楞等或去或不去及伊等尙肯救過贖罪與否並聽伊等自行揣度爲之朕亦無庸多諭○命江南各省嚴禁躐躐○准漕船回空耗米留倉抵兌○署雲貴總督愛必達等奏據鎮康土知州刁悶鼎報稱緬王長子因鬼家仇殺窮蹙無歸帶領土目人等由二鎰坡在木邦所屬之蠻弄寨暫住等語查緬屬木邦地方與滇省鎮康孟定耿馬等土司接壤見於邊隘嚴防報聞

五月戊辰朔諭軍機大臣等據玉保奏伊並未行文策楞令其停止進兵一摺此語更屬悖謬試思伊卽並未阻止策楞而逆賊阿睦爾撒納究竟脫於誰手伊等如果協力同心彼此不相推諉何以貽誤至此卽如拏獲額琳沁一事伊屬人既有抗拒情形卽應

奮力勦捕收其馬匹乘勢追擒則阿逆必不至於漏網及遣使哈薩克又復如此畏葸游移玉保獨不與聞其事乎再前奏阿逆脫逃時兵力無多今則突稱帶往二千人種種自相矛盾明係有心欺飾若仍令參贊軍務必至掣肘債事著將玉保革去參贊大臣仍在領隊大臣上行走以供驅策此次若能奮勉尚可寬宥儻稍有退縮必重治其罪達爾黨阿近日辦事甚屬勇往著授爲定邊右副將軍巴祿見往軍前辦事著授爲參贊大臣○己巳命各省州縣交代依限冊結並繳○辛未諭軍機大臣等詢問富德解到哈薩克呼岱巴爾氏等告稱阿逆逃竄若由阿勒坦額默勒庫隴癸嶺經過沙喇伯勒地方可至右部哈薩克境內等語沙喇伯勒地方卽係伯什阿噶什所居伊向與阿逆交結今尙未見投誠或與阿逆同投右部哈薩克亦未可定著達爾黨阿玉保確探阿逆

逃竄去向追蹤緝拏若伯什阿噶什與阿逆會合則先掠其遊牧以增兵力前已降旨令策楞等籌辦伊等身任將帥並不慮及必待朕之指示不知伊等所辦更有何事卽伊等緝賊之不力於此益見且哈薩克錫喇尼瑪等皆熟諳情形之人阿逆向何處逃竄亦應詢問伊等辦理○壬申諭軍機大臣等策楞等奏古爾班和卓係哈薩克仇敵去年卽行投誠亦無附和阿逆之事等語此奏甚屬錯誤古爾班和卓不特上年並未投降且班第等前經奏稱伊因擒獲達瓦齊曾爲阿睦爾撒納稱慶則此時與阿逆同行亦未可定著傳諭達爾黨阿玉保大兵前進古爾班和卓若將伊遊牧內移前來謁見則可准其投降否卽用兵將伊擒拏解送京師並收取其牲畜以佐大兵進剿之用○癸酉命尙書阿里衮同公明瑞往軍營在領隊大臣上行走○甲戌諭據策楞等奏見駐登

努勒台將馬匹牧放並咨會達爾黨阿令其撤兵回駐並將玉保所帶之兵亦令撤回牧放馬匹等語達爾黨阿接到咨會隨以伊見已帶兵前進且兵糧足敷至七月下旬無庸撤回一面咨覆一面具奏達爾黨阿所見甚合機宜從來用兵之道有進無退況追擒叛逆期在必獲斷無兵已進發復令撤退故使往返稽頓之理朕前降旨令玉保帶領索倫兵五六十名先往哈薩克索取阿逆隨令達爾黨阿帶兵繼進策楞亦卽帶兵尾隨節次諭旨甚明乃策楞等不惟不能剋期前進反將玉保所帶之兵亦行調回止令玉保以數十人先進豈不更爲可駭信如伊等所辦則是以追擒叛賊之事僅委之玉保數十人而伊等安坐軍營且並欲奪其兵力而置之危地此何心耶伊等身爲將軍將佐功罪皆其功罪玉保儼有僨事策楞等能脫然事外乎至前諭令將馬匹在登努勒

台牧放原因大兵未經進發彼時策楞等觀望遷延藉口於馬力疲乏朕實不勝憤懣是以令將未用馬匹牧放臆壯卽行進發先令玉保輕騎前進以期速達耳今達爾黨阿業經帶兵前進策楞不卽行續進已屬大謬乃轉稱遵旨將馬匹牧放且將達爾黨阿已進之兵行令撤回幸而達爾黨阿能知事勢輕重不肯隨聲附和使竟聽其言聞調卽行撤回將成何事體耶此次追擒叛逆在庸懦無識之人未必不謂策楞等坐失機宜實由馬力疲乏口糧不繼所致試思經旬已進之兵旋復調撤回不卽以此回程馬力用之前進乎豈前進則疲乏而撤回則甚易乎如此進而復退馬力豈不更加疲乏乎至於隨帶口糧策楞等前赴軍營較達爾黨阿由北路起程先期二十餘日何以據達爾黨阿所奏尙可數數月之用而策楞等則早稱缺乏且巴里坤續運口糧俱已起運在

遂而策楞等輒行文停止及至臨期需用乃向各鄂拓克索取伊
奏馬力口糧之語均不可信不過以是藉口掩其怯懦之罪而策
楞等乖張謬誤種種不堪特借購集馬駝接濟牲畜爲遷延之地
其罪復何所追耶將此通行傳諭知之○諭軍機大臣等策楞等
辦理軍務種種謬妄已降旨宣諭中外策楞著拏解來京治罪伊
子特通額著革職交與達爾黨阿令在軍前效力贖罪扎拉豐阿
本應同策楞一體治罪念伊等係蒙古人從寬革去郡王並副將
軍令其回至巴里坤自備資斧赴伊遊牧玉保此時如已帶兵向
哈薩克卽無庸拏解若仍在達爾黨阿隊內卽遵旨拏解來京治
罪達爾黨阿著補授定西將軍兆惠著補授定邊右副將軍永貴
著加恩賞給副都統職銜在參贊大臣上行走此旨著交阿里衮
齎往俟至軍營遇見策楞玉保等時再行宣諭○諭巴圖爾額默

根上年投誠時未經入覲朕曾施恩封伊子和通鄂勤爲扎薩克頭等台吉今巴圖爾額默根當阿逆擾亂之時並未附和管轄屬人安居游牧甚屬可嘉亦著加恩封爲扎薩克頭等台吉○丙子諭軍機大臣等據侍衛中秋奏稱詢問自阿逆處逃出之厄魯特巴顏告稱阿逆惟同喇嘛及哈薩克屬人三十餘人見在摩多地方離阿布賚遊牧路止三站等語看此情形隨阿逆逃竄之人俱各離散力甚窮蹙誠能迅速追逐早應擒獲今已不免遲誤著傳諭達爾黨阿卽照巴顏所供逆賊逃往之路帶兵前進途中遇見阿逆離散藏匿之人卽行剿滅直入阿布賚遊牧悉力搜捕務期弋獲從前諭令領兵至哈薩克邊界勒取阿逆毋庸進兵因尙不知阿逆果否逃往自不便卽加以兵威今偵探旣確而哈薩克若不遵諭擒獻則是有心容隱應卽將哈薩克辦理達爾黨阿等務

大振軍威勿稍示怯亦毋庸拘泥從前之旨已令中秋將巴顏解往達爾黨阿軍營可詳細詢問情形帶領前往再巴顏供阿逆處見止烏勒木濟同行並未言及阿巴噶斯哈丹等阿巴噶斯等或已同至游牧或在中途隱匿達爾黨阿沿途留心查訪一併擒擊解京治罪並傳諭哈達哈等卽將烏梁海事辦竣領兵徑赴阿布賽游牧會同西路大兵奮力剿捕毋得少有遲誤○諭前命策楞等至伊犁時查拏阿睦爾撒納之姊扣肯今據奏稱已爲普爾普擒獲見在解送前來等語普爾普著加恩授爲散秩大臣遇有宰桑員缺仍奏聞請旨補授○庚辰 上詣 黑龍潭祈雨○諭軍機大臣等哈達哈奏北路所帶馬匹牲畜不能肥壯見在勉力行走等語此不過留爲日後推卸之地耳前令伊等由烏梁海進兵哈薩克原因辦理烏梁海之後取其牲畜馬匹以增兵力更易集

事伊等若因阿逆係由伊犁脫逃擒拏之責應專委之西路北路相距遼遠又越烏梁海而行以此藉口逡巡觀望不但不能副朕委任直是自取罪戾耳哈達哈等如果奮勇自效朕必加以殊恩儻一味退縮雖多方支飾亦豈能逃朕洞鑒况見在西路止帶兵二千餘名北路兵丁已及四千今又派扎布堪駐紮兵丁一千名隨後策應以兵力多寡較之北路應更加出力方爲勇往任事哈達哈等惟當速期成功不得稍存歧視○辛巳諭軍機大臣等玉保等奏稱奇爾吉斯宰桑古爾班和卓等帶領戶口渡伊犁河隨派扎薩克達克巴等擒其屬人詢問情形旋據古爾班和卓等遣人稟稱並非往投阿逆懇求移至阿爾台地方等語扎薩克達克巴差委效力奮勉可嘉著施恩賞給孔雀翎並傳諭策楞等確勘古爾班和卓等如果移往阿爾台地方俟其至時另行安插若在

伊犁觀望顯有從賊情形策楞等卽會同尼瑪袞楚克扎布等所
領兵丁奮力剿捕取其馬匹牲隻以助大兵進剿之用○壬午吏
部帶領本年京察一等人員引見得旨此次太僕寺欽天監倉場
保送一等員數俱多於上次倉場衙門屬員尙多事務較繁且有
別衙門保送之員至太僕寺欽天監事務甚簡該堂官保送過多
著交部察議此內何國宗竟至保其親弟何國棟尤屬徇庇不合
著嚴加議處尋部議降一級留任得旨著再降三級調用○乙酉
諭玉保奏稱據從哈薩克逃回之巴布噶津告稱阿逆逃至哈薩
克境內納喇巴圖等計圖擒獻協力追捕已將叛賊所隨人眾剿
滅見止帶兩三人逃竄阿布賚處等語與侍衛中秋詢問巴顏所
供阿逆攜帶三四十人逃竄之語正相符合特中秋未向巴顏詳
悉詰問緣由未得哈薩克剿殺叛賊實在情形故有三四十人之

說耳阿逆負恩背叛反覆狡詐伎倆人人共知朕早料哈薩克不肯容納必至竄匿無歸今果止搆二三人奔逸可見策楞等若早能振作軍聲疾馳前進則叛賊早已就擒軍務當早經告竣而乃畏縮不前坐失事機卽如前此諭令遴選將弁曉諭哈薩克而策楞等輒恐其羈留我使至開費端遷延觀望仍不卽時遣往今觀哈薩克之恭順如此逆賊之窮蹙如此一一不出朕所夙料而策楞王保二人全無領會動輒後時所賴者上天默佑朕惟額手敬承益加兢惕耳若如伊等之步步瞻顧縱賊遠颺闔外之任將何賴焉再王保奏稱卽日前往哈薩克乃明知叛賊子身無助始敢直前追逐仍係取巧故智不然何前此恒怯之至幾於草木皆兵而今則一似勇敢任事毫無疑慮者此亦何能逃朕洞鑒耶將此宣諭中外知之○諭軍機大臣等富德等此次追緝唐古忒沿

途擊敗哈薩克各事宜甚屬奮勉富德莽阿納奇徹布並伯什阿
噶什之子博東齊散秩大臣達什策凌都噶爾宰桑烏爾古勒濟
勒卓特巴伯克孟克等俱著賞賚獎勵仍加恩授達什策凌爲內
大臣烏爾古勒濟勒卓特巴爲散秩大臣聞伯什阿噶什遭哈薩
克擾亂遷徙他往著博東齊前往尋覓遇見卽行奏聞儻有不測
朕自加恩於博東齊其遊牧卽准在額爾齊斯地方居住並著伊
宰桑諾斯海等悉心善爲保護至達什達瓦宰桑訥默庫曼集於
一切差委事宜甚屬奮勉著加恩授爲三品總管頃據玉保奏聞
阿逆僅餘兩三人投往哈薩克阿布資處玉保已領兵前往索取
富德等接到此旨不必追緝唐古忒卽由彼處前赴哈薩克協力
擒拏逆賊莽阿納達什策凌俱著在參贊大臣上行走一同帶兵
速進此時各路兵丁應已齊集富德等會同前往兵勢益盛務期

協助達爾黨阿等擒獻逆賊迅奏膚功歸途之便仍將唐古忒擒

拏治罪○丁亥以寶光肅爲左副都御史

原任內閣學士

○免甘肅甘州

等三府民屯額賦已完者扣抵來年正供○戊子諭駐防城守尉

之設表率將弁整飭營伍是其專責近京地方如保定等處城守

尉有護軍統領管轄其各省駐防有將軍都統者可以就近管轄

不時督查巡閱惟河南太原兩處並無大員節制且與所轄之佐

領官階體制不甚相懸一切稽查彈壓之處未免因循瞻顧嗣後

著卽歸於巡撫節制所有該員弁技勇及馬匹器械該撫隨時察

覈分別奏聞其有懈弛不職弓馬生疏者卽將該員弁據實參奏

○諭軍機大臣等巴祿奏稱散秩大臣輝特宰桑烏魯木生擒逆

賊唐古忒並勦滅伊屬人等烏魯木見已移至阿爾台地方等語

烏魯木深感朕恩奮勉效力甚屬可嘉著傳諭舒明阿蘭泰等俟

其移至阿爾台時傳旨獎諭賞銀一百兩酌量指與地方安插至陣亡之得木齊特古斯墨爾根哈什哈及兵丁三十餘人亦屬可憫著交烏魯木查明特古斯墨爾根哈什哈如有子嗣仍授爲得木齊並賞銀三十兩其陣亡兵丁三十餘名俱各賞銀十兩○己丑諭軍機大臣等達什達瓦宰桑訥默庫曼集在富德軍營行走昨因其奮勉效力加恩授爲三品總管乃不遵守法令私自逃回遊牧殊屬可惡若不從重治罪無以示懲著傳諭和起等俟訥默庫曼集回至遊牧卽行擒拏將伊不遵約束私自逃回情罪曉諭鄂齊爾布林托里等並達什達瓦部眾人等知悉卽行正法其所屬兵丁不過聽從指使情尙可原著免其治罪○壬辰 上詣黑龍潭祈雨○命甘肅成縣屯糧改徵折色○癸巳諭軍機大臣等據哈達哈等奏稱領兵至哈屯河水勢甚大將已經渡河兵六

七百名令青溪雜卜帶領輕騎前往其餘兵丁一千餘名製造小船更番渡河令車布登扎布帶領繼進等語哈達哈身為將軍理應身先士卒奮勉直前不得少存觀望之意今青溪雜卜車布登扎布俱已輕騎前進而哈達哈獨駐河干何以督率將領若似此遲延未知何日始抵哈薩克必致貽誤大事關繫非淺觀其所奏河水情形不過山水下流一時陡漲數日閒即可減退且覓其淺處未嘗不可徑渡何至如此張皇從前朕已察其有遲延之狀是以屢經訓諭今計此旨到日哈達哈自當已抵哈薩克境內務宜加意奮勉斷不得稍存畏蕙自取罪戾○改定 社稷壇瘞坎於西北隅並增望瘞儀節○乙未吏部議准署雲貴總督愛必達等奏滇省中甸地方自內附三十餘載地闢民聚原設州判一員管理詞訟錢糧等事稍涉疑難必赴府州請示往返千里更因

夷寨眾多設有土守備千把分地稽查統聽州判管轄而微員究難彈壓查楚雄府同知與知府同城並無專司請改爲中甸同知將州判缺裁再中甸維西地界接壤麗江向係麗江府所轄嗣因將鶴慶府通判移駐維西後將中甸州判隸劍川州遂均屬鶴慶府第自鶴慶以至中甸維西必由麗江取道寫隔殊難遙制應將維西通判及見設中甸同知俱改隸麗江府管轄從之○丙申諭軍機大臣等據策楞等奏稱古爾班和卓已經擊敗收其馬駝牛羊前赴哈薩克等語策楞等此舉蓋因從前朕屢責其不能擒擊阿逆始少加振作耳然首犯見已脫逃且奏稱古爾班和卓共帶八千餘人官兵奮擊斬首二千餘級餘眾鼠竄潛逃等語其所陳奏情形尙屬可疑古爾班和卓果有八千之眾雖勦殺二千餘人尙有六千非甚窮蹙何以遽行逃竄如其人已無多自可無庸置

念若果如所奏尙有六千餘眾則或潛伏一隅俟我兵經過後尾隨邀截皆未可定不可不豫爲防範見在伊犁辦事乏人策楞接到朕旨卽回伊犁不必前赴哈薩克惟傳諭各鄂拓克人等協力擒拏古爾班和卓一經緝獲卽押解來京治罪此次疏脫古爾班和卓咎在將軍大臣官兵尙屬奮勉侍衛瑚集圖率五十餘人奮勇爭先尤屬可嘉著加恩授爲頭等侍衛其餘著有勞績及中傷陣亡官兵等策楞卽查明具奏候朕加恩又諭此次擊敗古爾班和卓扎薩克達克巴甚著勞績著加恩封授公爵以示鼓勵○准商販往西北兩路軍營貿易○軍機大臣議覆策楞等奏從前台吉昆都斯車克爾等投降時因其所領戶口甚多請授爲公爵今查伊係閒散台吉公爵稍覺過優應照加恩加閒散台吉例改授爲扎薩克從之

六月丁酉朔命浙江山陰縣改建宗家漊石塘○辛丑噶勒雜特
宰桑根敦得木齊巴圖孟克率屬戶來降○壬寅諭軍機大臣等
哈達哈等奏辦理烏梁海等事已將竣惟首犯鄂木布呼圖克果
勒卓輝等尚未拏獲等語前哈達哈帶兵渡哈屯河時止令青滾
雜卜車布登扎布等先行而伊獨逗遛河干朕已降旨申飭哈達
哈身爲將軍理應身先士卒何故逡巡不前今辦理烏梁海事雖
多所斬獲而首犯脫逃皆伊不能督率用命之故此時亦無庸深
究著卽將烏梁海辦畢速赴哈薩克緝拏逆賊毋得仍前玩誤舒
赫德隨同哈達哈辦事甚屬無益不必前赴哈薩克著卽回至烏
里雅蘇台辦理糧餉事務○甲辰命各省慎選鄉試同考官○丙
午諭軍機大臣等朕前降旨令策楞不必進兵哈薩克卽回伊犁
辦事恐伊自知獲罪難追仍行前進亦未可定著傳諭達爾黨阿

見策楞時取其將軍印信卽行拏解來京所有副將軍印信交與兆惠佩用並將策楞種種謬誤拏解治罪之處曉諭哈薩克錫喇尼瑪等知之○丁未諭昨據策楞奏庫木諾雅特台吉特古斯們都阿道齊投至軍營訴稱阿巴噶斯因伊弟至庫克烏魯木地方患病不能行走遂不與阿睦爾撒納同行潛往特古斯們都處居住見在嚴檄擒拏今據巴祿奏到聞阿巴噶斯藏匿博羅和里雅地方卽親率官兵一晝夜兼行倍道前至該處已拏獲阿巴噶斯及伊弟哈丹和津等語阿巴噶斯首先附和阿逆助惡相濟爲之羽翼後隨同奔逸今乃率其兄弟三人潛歸伊遊牧地方觀此則其窮蹙情形與阿逆眾叛親離毫無倚賴之狀昭然可見巴祿聞知阿巴噶斯所在卽能帶領官兵踰山涉水星馳疾掩應時擒獲可見此等逋逃餘孽我官兵果能鼓勇窮追自必就獲而當阿逆

逃竄之時距我軍營甚近乃王保策楞妄生疑沮坐令遠颺由今日阿巴噶斯之就擒觀之則前日阿逆之免脫豈不令人憤懣耶且如辦理額琳沁一事在策楞等方且自以爲功殊不知額琳沁挺身前赴軍營原有歸順之意若能善加撫馭令爲前驅未必不爲我用卽不然則當速行剿取伊之輜重藉其牲畜之力前進捕賊乃一無計畫以額琳沁人眾疑畏徘徊任其四散僅得一老嫗之額琳沁亦旋即病斃於事何濟又如辦理古爾班和卓則僅得其牲畜老弱而渠魁仍復竄逸伊等身任戎行種種乖謬貽誤如此罪將奚追豈達爾黨阿巴祿所將之兵皆勇夫所騎之馬皆肥壯所裹之糧皆足數而策楞身爲將軍所有兵馬糧石反不如人耶巴祿及在事官兵辦理妥協甚屬可嘉已另降旨並將此宣諭中外知之○癸丑諭何國宗見在降調所遺左都御史員缺著趙

宏恩補授工部尙書員缺著汪由敦補授刑部尙書員缺著劉統勳補授劉統勳未到之前汪由敦仍辦刑部尙書事趙宏恩以左都御史仍兼管工部尙書事何國宗見差往伊犁一帶測量雖經降調仍准服用原官頂帶俟回京之日朕酌量另降諭旨劉統勳從前妄議棄巴里坤退守哈密正當逆賊初叛之際朕恐其搖動人心阻撓軍務且果如其言阿逆何至窮蹙無歸束手竄入哈薩克觀其至伊犁而不能守更復有何伎倆敢於侵擾內地則巴里坤之斷無可棄理亦甚明是以將伊革職治罪然當其時劉統勳因目擊永常恩遽情形驟聞其言未能深察是以張皇失措夫永常身為將軍膺闡外之重寄尙且怯懦退回甘心僨事劉統勳本係書生未嫻軍旅其所陳奏識見固屬冒昧舛謬尙爲乃心公事假使彼時藉口於職在文臣辦理軍需不與師行進止模稜觀望

緘默自守轉可安然無事且如策楞玉保等皆統兵大臣當阿逆窮竄遁逃距軍營密邇乃仍徘徊不進坐致遠颺彼三人者皆滿洲蒙古世僕勇敢舊風未遠而皆選懦至此以劉統勳文怯漢人相提並論則其過爲可諒而其心轉爲可嘉矣至何國宗職司風憲乃於京察大典竟將伊親弟列爲一等雖古有內舉不避親之語然有祁奚之公則可試問何國宗兄弟能無愧祁奚所言否乎此所關係於官常者甚大不得不示以懲儆朕用人行政毫無成見賞罰予奪惟一秉至公期於各當將此宣諭中外知之○丙辰調德福爲福建布政使以葉存仁爲廣西布政使朱邦綬爲河南按察使由四川川東道遷○伯什阿噶什屬下宰桑賽音伯勒克來降○丁巳諭軍機大臣等雅爾哈善等奏吐魯番回人莽噶里克貢獻馬匹請率伊弟額什里木子呢雅斯同來入覲等語莽噶里克威

戴朕恩誠篤可嘉第見在令大兵擒拏阿逆而準噶爾地方連年擾攘匪竊甚多伊遊牧內正須管轄此次著於伊子弟中派出一人來京莽噶里克著暫停入覲俟一二年後再行請旨○扎拉豐阿奏烏魯特宰桑賴德勒齊擒解伊族宰桑和爾和岱前來訊係附和阿逆情形屬實卽行正法報聞○辛酉禮部議奏昌平州明代十二陵向設司香太監十六名多係虛設且距京稍遠稽查爲難查每陵有看守陵戶三名又有世襲一等延恩侯歲時承祭應將前項太監裁歸爲民所遺養贍地畝交地方官同原撥祭地招佃收租辦理祭品並令選老成殷實者充補陵戶守護又該州明代妃冢六處卽十二陵太監承管今旣裁太監應添陵戶四名各給養贍地三十五畝餘地並交地方官招佃收租又西山有明代景泰陵及墳塋數處原有司香太監六名應並裁酌設陵戶二名

照昌平州例辦理又江南明太祖陵亦有太監應行令江南總督查明照辦從之○癸亥諭軍機大臣等喀爾喀王公台吉內惟和托輝特郡王青滾雜卜受恩最深上年在軍營時將軍大臣等參奏阿逆罪狀伊敢私自洩漏且於阿逆前百計趨承以致阿逆趾高氣揚肆行無忌後於追緝阿逆之時觀望退縮奏稱必得兩路出師五萬方可追擒種種乖謬指不勝屈前此屢欲拏問朕念伊祖博貝舊日勞績施恩寬宥今無故自軍前擅回又揚言額琳沁多爾濟達木巴扎布等治罪之後眾心疑懼而喀爾喀數年以來皆以用兵爲累以其怨望之私託爲他人之語妄行瀆奏藐法已極斷難姑容必當明正典刑以示儆戒但達爾黨阿哈達哈等見在領兵前往哈薩克不便派兵拏解著傳諭舒明阿蘭泰等如青滾雜卜撤兵回伊遊牧則此時無庸辦理俟達爾黨阿等擒獲阿

逆凱旋時降旨令伊等拏解儼伊前赴舒明等駐紮地方卽降旨
拏解來京治罪舒明等務宜加意懷密勿使洩漏致伊聞風脫逃
○諭從前阿里袞赴軍營時朕曾降旨令拏解玉保來京治罪今
據達爾黨阿奏稱玉保自知罪譴前赴哈薩克中途遇賊人交戰
尙能出力著加恩毋庸拏解授爲頭等侍衛以觀後效○諭杜爾
伯特台吉伯什阿噶什帶伊屬人八百餘戶至額爾齊斯奇爾庫
爾圖等處遣人前來投誠等語伯什阿噶什係杜爾伯特大台吉
屢被哈薩克搶掠傾心投順甚屬可嘉著封爲親王○諭伯什阿
噶什曰爾誠心感戴率領屬眾投誠甚屬可嘉前大兵抵伊犁時
爾卽謁見將軍大臣正欲加恩封賞旋遇阿逆背叛未及舉行今
爾屢被哈薩克搶擄展轉遷徙始克內附已加恩封爾爲親王聞
爾見在抱病屬人又經遠行此時毋庸派兵從征亦不必向內地

遷移著卽在額爾齊斯等處遊牧爾杜爾伯特台吉車凌等將來
卽令歸至舊日游牧地方爾等皆係同族聚處一方實爲允協正
不必遠離故土徒勞往返也俟爾病痊後明歲來京入覲更加賞
賚前博東齊告稱爾遇哈薩克擾亂未知蹤迹方深廕念今覽奏
不勝欣慰至博東齊並非爾子從前在軍營時捏稱情由爾卽查
明奏聞○乙丑諭軍機大臣等舒明等奏杜爾伯特台吉烏巴什
同伯什阿噶什前來投誠烏巴什見因患病遣人先行告知等語
伯什阿噶什已加恩封爲親王烏巴什亦著加恩封爲貝子卽同
伯什阿噶什等在額爾齊斯等處地方游牧俟明年令伊等前來
入覲